

清容居士集

冊五



線
845.74
574
v.5

舊籍

清容居士集卷第十八

元之袁桷

撰

記

慶元路鄞縣學記

粵昔授受緒絕空虛固陋之學淪於人心言理者人人殊師記問者質而不化詞章篆刻決裂六藝糜爛而不可救師儒有憂之據道德性命之要毫分縷析鑿鑿乎其不可相紊也繇是士得以一其視聽皇王之道復興於千數百年之後可謂盛矣世祖皇帝混同區夏崇學校定國子學成憲皆東南儒先而朱文公所說咸取以爲經史模楷於是窮徼絕域中州萬里之內外悉家有其書然而急近功者勦取其近似以爲口耳之實天人禮樂損益消長切於施爲所宜精思而熟攷者一以爲凡近迂緩而不講至於修身養心或相背戾而不相似則緣飾儼默望之莫有以窺其澁際夫明絕學以承先聖之統可謂難矣弊生於苟易守其說而湮其本將不勝其弊載籍極博莫嚴於五經教人之法莫詳

於三物揚子雲云丘陵學山而不至于山惡夫畫也鄞舊有學王文公安石爲宰時延會稽杜先生醇教之學者輩出至大二年郡大火學燬之主邑之學曰孔文篤董儒金始建講堂禮殿未及完而去皇慶二年三衢姚熙載實來是歲天子下科舉詔同知郡事吳郡張侯某顧瞻陋蕪首曰其何以稱上意迺率郡官而助之邑令梅君遇春丞簿龐君滋范君祐咸曰吾長於是茲役曷可逭嚴工庀程戒隸業者咸輸以佐閱二年夫子像成循從有敘門廡庖庾塗牆繚繞之屬堅密精粲學宮之制完且具矣姚君迺曰鄞號多士昉杜先生宜作先賢祠以祀鄞士之興其自今始乎嘗謂學校宮室殿謁循行風俗之使者未嘗不督厲修繕獨教法未定雖聰明自任猶不敢高下以議今明詔四出郡侯首勗其原姚君又能推本前人尊師之旨深有所寓楫雖官朝廷因姚君之請知張侯之美遂以學校之弊首敘其說庶幾吾里秀士強敏自修詢考耆哲篤行於顯微內外之實文質交資上承詳延將以復乎昔時之盛則姚君之闡微其意深矣庸刻于石願有以俟焉

鄧山書院記

粵若古儒先各以方國所尊祭于學社自漢而降定孔子祀餘悉徹廢今百年來始有事于先師其居邑講習治官游衍之地崇闡相望或者病焉夫氣流六虛神而存之聚者易推遠者難窮聲音笑貌之感若將企焉如弗及者理有在也合吳越楚蜀之地咸尊以師惟朱文公世祖皇帝一海寓定甯子學取文公訓註爲學制郡縣益遵守而祀於江南者復得推衍大德二年四明趙壽家儒科慨然請于朝曰伊吾祖鄂州善待從文公游今天子興是學願割田別居以祠而名曰鄧山事甫下趙氏卽世七年三山林德載氏奉命祇事屋毀弗稱旋辟田沒不可問覈故整圮實完實成奠薦齋明陟降儼肅賓老佐祭侯伯合餽又三年俾繫其事于石袁楠曰維我四明薦紳先生辨釋著微實相表裏源同流分塗殊轍一合私而惡異標榜之弊也炳然彝訓理何外焉學以殖身德以敦本斯道立矣執空說以爲證弊不勝舉惟性與道匪言是夸楠懼茲久願相與勉焉林君精敏慎修宜展於世文公之學不墜審由是也大德丁未春後學



袁楠記

鄞縣興造記

鄞爲縣延亘三百里環山帶江西爲沃區其民盡地利近東瀡爲湖土廣而俗雜逐島嶼魚鹽之利出沒于海上歲千百數林藪川澤之隸于鄞者不假于外故號爲劇邑邑復輔城以居尤爲難治縣上事郡署曲直縱舍承指意一不得便輒指擿辱撓關臨相通縣勢始振後凡爲縣者率用是自治而民益困矣大德七年帥府始移鎮控扼水陸衆曰郡有二府縣益不可理八年真定盧廷信氏丞于茲推勤服廉沈斷靜修罪疏于罔訟辭于庭朞月而郡侯尊焉大府任焉宅邑之讞咸質以定旁郡之賊悉檄以正顧瞻四周令主簿是謀先時縣燬經始陋庫不足廣迺撤而新鳩材于山負者以競輸役于徒民以不病首于臺門廳堂亭廡凡五十有楹智周而勞簡噉然以深翼然以容謁者趨者視聽易慮於是耆艾謹然以謠曰伊丞之來吾民不知吏屬旣荒吾民相忘彼庭開明維丞之平雍雍其堂富民恐傷有亭是休思賢悠悠丞之戾止毋譁以喜後

兮今兮維今是似咸謂橈嘗職太史筆削無避溢遂不得讓役始於乙巳之十月越明年 月成丞嘗爲行掾中書有吏能令長忻都次爲東平周汝弼氏簿澄江朱申氏也余愛其成紀以示後俾知鄭爲可治大德十年十二月日袁橈記

西洛書院記

河南薛公遵先君子之命建義學于永寧矣龍頭山有故跡焉蒼崖嶄然宋元祐中天台羅適正之大刻其上曰洛書錫禹之地正之安定胡先生門人善水利所至通陂埭屯田之美按地志永寧併長水縣長水東臨洛川記傳云洛書所出今龍頭山新立禹祠而薛公仰止亦近得請于朝爲書院遂更其名曰西洛且俾夫後人知禹洛書之誠有自粵昔九疇垂象示文夸誣相矜祖緯襲符漢世明經之士汨於休咎莫窺其真歷千餘年儒先大興闡天人之祕方圓相通正學以明然同黨之說勝一以爲已是一以爲傳授數精理湮皇極之建卒無以大通民有恆性君師作之以修以綏如彼北辰樞紐運行內靜若動莫窮

其化凡厥有生極迺固有性者爲聖復者爲賢作而新之維后是訓庸保其極則民永以乂保極者民作極者君運而制諸若丸之在握輪之在御皆聽命於我孰先後焉孰終始焉四時萬化之理絲是而備謂之攸敘夫豈捨己而隨彼也昔大禹佐理水土攸平君臣交修抑亦有定制洛爲天下中碩儒訓傳家有其書慎厚遜讓猶有先王之遺風陞西洛之堂者當慨然以思謹其執中將見夫作人如新之驗由鄉而達于邦國勵之翼之示諸于掌皇極之訓其效可成也薛公名友諒溫密有文今爲翰林直學士推先志之私淑煥而廣之爲屋凡若干楹又將延師以教後之學者而屬筆於楹故以昔所聞者著爲之記

建城夫子廟堂記

景城縣東南三十里有故城焉曰建城漢爲中水縣地金大定中以其地北臨淳沱南薄御河徙縣於今所二水交流名之曰交河焉皇慶元年保定王君領縣簿事循河故堤水落冬月先期率民以補其缺頽霖雨時至則因其防而巡督之河不橫流政簡民佚觀風省俗聿來于茲望其井屋聯屬誠阜且康於是

士林之秀曰劉國芝耆老韓昌等言曰建城舊有先聖廟城址日圯而廟莫敢廢在昔許文簡公安仁嘗撤而新之未幾金亡居室燬蕩而獨巋然以存至元戊子國芝之父禎遂易於文簡公之故居以詔于里士弦誦之聲家至而日化矣王君周旋里門念崇而新之於是治書侍御史張侯完以書來曰吾里夫子廟易代有存許劉儒先作新之志子盍廣諸敢以楮幣若干爲里人勸於是下令輯工奠方闡基表植巷道庭宇邃嚴以丹以塗論講有堂游息有廡明年率其儒生落而祀之迺介刑部員外郎葉蘇君俾志其事粵自塾庠序學之制不明而士無所於學州縣有學率歲時奠祭貿貿道途謹修其故常於造士乎何有成周之學備四代而畿內爲序十有二爲庠三百左右之塾復不預焉噫先王教學之興何其盛也學必釋菜於先師虞庠爲鄉學有堂有序得行釋菜之禮記禮者之言也釋菜於廟則自魏晉始也遵古之學從今之禮損益之變不亦可乎且鄉校不毀鄭人美之今天子下詔明鄉里選舉之法建城之學者由是而升司徒者將皆敦讓重厚敏者謹其藝能恂恂于于仰止昔賢舉不絕書

而王君化民成俗之美庶得以傳于後王君以習國語始爲樞密院從事各某治縣有法類是

封龍山書院重修記

世祖皇帝以盛德深仁正位纂圖越二年始立翰林院真定李文正公首以碩德耆壽俊召爲翰林學士未幾告老以歸隱于封龍山封龍在恆山之陽公幼侍東平府君受業焉地舊有書院兵革蹂躪公拮据盡力以成之故其居朝廷也食息不忘茲山天子察憫其志俾食致政之祿以終老於是公作新斯文遠近之士咸秀出暨公下世踰二十年其從公而顯者曰史忠武公諸子曰杠曰曰杞曰輝廉訪使荆幼紀集賢學士焦養直廉訪僉事張翼宣撫崔某其餘贊成均授鄉里名不能悉數而真定之學者升公之堂拜公之像未嘗不肅容以增遠想也皇慶二年其曾孫慎言爲翰林屬仁宗有詔省掾用儒士擢入佐左司院中選都事僉曰李文正公爲翰林肇端其曾孫宜以居未幾拜監察御史而於封龍也惓惓悉如公之志歲久蕪蕪不治往至治元年爲司農屬時請

于司農符下其道廉訪丹漆木甃悉撤以新御史有言曰繼述志事子孫所謹
我先公之爲茲也實將以佐國家之盛願子記之桷曰致太平經濟之道章句
佔畢不能以盡也文正公恬於進取率躬以化其鄉耄至而辭祿德之本也導
掖其秀民仁之至也其徒卒昌於時孰不曰文正公所作成也今遺書具存在
於書院者宜究其委源考三代之所以長秦漢之所以失反躬以思平治之道
如指諸掌將反覆以陳于上李氏世守家法則書院永永代有嘉譽其繕修也
益廣於今日矣本末具前記不再書

慶元路醫學記

醫之書作於上古乎後人猶疑焉陰陽氣運之說與易書禮相脗合蟲魚草木
之精詳於詩尤近之然其辭義奧古卒莫能通曉非專治者不能也先王知之
始爲之師以教之後復立學以長之生人之本絲是備矣至元壬辰濟南陳公
祥爲肅政廉訪副使來四明遵詔旨立醫學學成甫十有八年燬焉其地近市
狹紊咸病展事鄞縣西有故主簿廳事基及傍近地蕪礫不治於是教授徐君

源道等請于郡遷以廣之迺斥其舊地得財若干以治土木郡侯完顏公首爲之勸推官賀某贊補其役隸于醫籍者胥率錢以輔之逾年而學完殿廡翼成軒闊深靜會予自京師還里屬記其事余幼嘗聞長老言鄉里多名醫皆修謹退讓呐呐然若不勝衣察脈視色必原於井谷經絡之微眇調製湯液必通乎風土之宜甘辛燥溼內外相爲表裏者悉參取於經傳故其術百不一失懷疑審問求正於勝己無忌悻之謬道同而氣和相遜以禮相處以義而昔時公卿家激厲獎與之道又能使盡其術而無愧噫亦盛矣今皇宇恢廓五方士民參雜乎州里拘而不達將不勝其弊率焉以僥倖懼其深有所失也徐君世儒醫教授是邦今二十餘年重靜而不撓昔之所聞徐君深知之廣天子好生之德諄諄然語之使後之學者誦其書毋執一以自滿虚心遜志復昔時之長厚不幸罹于疾病將得盡其順受無天閔之害則徐君之教不亦闡乎余歸田里尙幸而有見也

釋奠先聖先師定著於祀典而鄉社之所宜祭皆廢不舉宋初肇建四書院釋奠釋菜之禮悉遵令甲若鄭玄所言高堂生毛公制氏之徒皆不得專祭僅列於從祀濂洛之說行於是先賢之祠競立首於其鄉復推其居官游歷之地甚者謂其觀風宣化雖其足跡之所不至亦當有祠夫古不墓祭謂其神專於其居室也又曰不歆非類謂懼其瀆而不正也今郡縣朱文公祠最廣各慕悅胥勸終莫能有病之者繇是空巖海嶼屹然巋立而入仕者借是以爲資歷何先賢祠祀先後盛衰之不同也朱文公之高第曰黃文肅公天下尊之曰勉齋先生其學以持敬爲先探微鉤深以極夫操履之實懼其守之不專則蚤夜以思斂其粹精絕其枝蔓正誼明道見於經濟故其臨川漢陽之政惓惓於征繕獄訟而論者始不敢以儒爲侮守邊議戎衆皆咎時宰用非所宜而公益得以據其素講事至而不懼政成而不迫是則儒者之效惟先生足以及之先生嘗曰吾於江東之友得三人焉曰李敬子胡伯量蔡元思時廣信之儒先劉君養浩蓋獲登其門朝夕習益悉以先生之指授者爲標準寶慶元年入太學舍法成

淳祐七年授寧國府教授後進之士從劉君者無虛日相地於白石山爲精舍以處學者祥刑使者建安蔡公抗扁之曰白石書院蔡公之於文肅皆文公之門人從劉君者悉稱爲白石先生天運合一白石之子安緝其齋廡曰先君之承先師曷敢墜替誦聲屢武益廣其舊後爲湖廣儒學副提舉以歿有子曰光復慨然曰大父師友之傳不可以不垂久遠文公祠遍江南祠文公則文肅道得以尊久遂買田築宮中爲禮殿書院之制悉備殿北立文公祠以文肅侑食後立大父祠繇是傳授之旨益信所隸有司上其事于中書省省允其言始定置山長入選調旣成俾桷書始末著于石章噫文肅文公之忠臣也疑者補之異者同之不以一時之辨爭而立其黨與見于成書故其匡輔之功若文公之於程子今之尊文肅者能若是斯得矣光今爲史院編修官敏達知治體文肅之學是誠有望焉者也

昌國州重修學記

青社韓侯莅是州踰年顧瞻學宮頽圯日至喟然歎曰化民成俗必自學始爰

相厥攸鉤稽負逋治其島租墾其間田究整是先泰定元年十月甲子役與用
工二千有八百計緡錢二千有五百匠石日食之費則諸生欣輸以佐於是殿
堂門廡齋庖池徑咸得備具謂桷絲翰苑歸俾記其事桷嘗聞之先儒以明理
爲綱領譏詆漢唐不少假濂洛之說盛行誠敬忠恕毫分縷析一以體用知行
概而申之絲是髻亂之童悉能誦習高視闊步轉相傳授禮樂刑政之具獄訟
兵甲之實悉有所不講哆口避席謝非所急言詞之不工則曰吾何以華藻爲
哉考覈之不精則曰吾何以援據爲哉吾唯理是先唯一是貫科舉承踵駸駸
乎魏晉之清談疆宇之南北不接乎視聽馴致社亡求其授命死事率非昔時
言性理之士後之學者寧勿置論而循其故習者哉昌國惟四明海中州士之
興起自紹熙始著樓宣獻公袁正獻公楊文元公尙書深寧王公嘗記其建學
論堂之本始揚雄有言曰百川學海而至于海善喻者也首之以訓詁之精次
及夫名物度數之密由小成至于大成非積年不能以至周官鄉三物之教詎
止執一而以爲傳道之要殆不可也委流安行由蹇而達訖歸于海學之功也

侯名搏字仲舉既與其學迺復儒役以爲大比之勸學之士子寧不自勵敢執筆以俟是役也州之長某州同知黃棟孫判官張信吏目陳益學正孫恕皆協贊其事泰定二年二月癸卯具官袁桷記

昌國州醫學記

醫之道卽夫人身以備三才其說與易箕疇詩禮相表裏亦大矣哉蓋昔之君師聰明神聖因夫五行以寓于五常之形氣致坎離之用以合其陰陽推其運行以齊夫寒暑考九州風土之宜別溫涼燥溼之高下蟲魚草木纖悉備具非博習廣聞者不能也至於七情旣發之偏必求其中以返于正皆吾儒傳心之極論有察於聲氣臭味之眇忽考之於遺書受之於家庭積歲年不能以竟而掌政令者從是稽其醫事以制廩祿是則庸有天闕疵癘之憾也哉南北地氣有大不同而爲之醫者各執己論近者急於好尙而恣縱不能商度十失五六誠可罪也秦漢之主率望海求不死藥藥詎能令不死蓋其空巖絕島磅礴於巨浸之際絕鷲塵接雲霧靈根異草得地氣之正方外隱士時採其奇絕精良

以療治輒奇中而功倍今所謂海上方皆其苗裔而昔之集方論者復蒐類于蛟龍之窟穴海於天地間號最鉅焉得以有遺也昌國爲州四履皆海至元二十九年始立三皇祠綿綿不稱韓侯治儒學旣竟復莅醫學茲曷以奉揭虔廣其故址而二倍之泰定元年冬十月正殿成復立論堂翼以東西前爲儀門外爲神門廊廡有序祠象儼赫首以圭租勸民胥成不三月咸樂以助復遵詔旨爲惠民藥局工旣畢書來俾書其事于石楠嘗謂疾痛苛癢切於吾身者猶民之身也民困魚鹽侯能紓之儒病徵科侯能復之旣憂其生又懼其罹於疾病使夫習爲醫者講肄以精其術故余歷敘醫家者流其學實難三聖之書昭然具存反覆紬繹皆得以完其生是侯仁政之本愈遠而愈不可忘也

定海縣重修記

定海爲縣自昔號重地鎮遏戍守異於它所南受諸蕃絕域之飄舶東控島夷不庭之邦商賈舟楫噴薄出沒據會濟勝實東南之奇觀也皇元考圖受貢益倍于異代信使香幣渡海歲不絕縣令將迎日疲於供事視公宇若傳舍歲益

圯剝至治二年忻都君始莅事曰吾受天子命長邑於是失撫字則奚以仕歲適大歉徵租於民將不勝逋負計歲所入一萬有奇遂覈其實止輸奇于官鹽賦歲不登民益以困卒請而蠲若干嚴飭官驛置隸人以候過客而復其役久而曰吾將治所居以聳民視瞻一撤以新爲楹五十餘瓴甍木石丹漆箭鐵皆堅緻可永久教諭蔣君昭先列其行事俾爲記余謂治縣莫先於宜民承上意而不鳴其疾苦甚者增羨以求媚善譽乎何有縣當水陸之衝輒默計歲月得解職卽謝去植仆舉弊終其身未能也若是則忻都君之行事汲汲慕古將有以大其所爲夫豈苟計目前之功效者哉余特記其興造使來者有攷蔣君所述多善政不復著推其所爲舉綱以遺目蓋可知矣是役也尹曹敏中主簿薛炳悉力贊治故迄用有成

新建鄞縣尉廳記

郡治絕江其地名甬東吳王居甬句爲古浹口號甬江在今海濱海達于江入於奉化西醜于餘姚縈紆回曲綿亘百餘里鄞爲縣分東西以浮梁爲界東之

民習網罟魚鹽以自業其地膏沃有湖可以灌浸率不善墾治春至輒率其子弟文身權歌出沒於海島伺危薄險對面成姦宄憲令昭著至死有所不避尉以巡督爲職自宋雍熙間置尉治於彼蓋重其地以鎮遏迄今數百年游手益夥捕繫無虛日靡燬于兵踰五十年尉率其兵徒隨所寓無常地訊錄之所不具於觀瞻莫格其非而任益以困矣至治三年廬陵周君一夔來視故址曰吾不可不自重首爲外門復爲廡門中建聽事挾以賓榮輔以吏舍後設燕居以休其勞清流匯池花木列植周繚塗墻皆足以支永久吏有言者曰尉職在察盜圜不立奚尉之爲茲土之民俗弊已久嵯禁之嚴莫窮其窟穴朝夕胥發纍纍旁午不有以居將曷能以有處尉笑曰道德齊禮夫子之訓也獄市無擾相國之言也閱數月獄以空告於是輿人有言曰尉之申申非取異以求新塞其姦悖養其淳真彼疇鱗鱗良苗氤氳尉之去兮將以告夫後之人役始於泰定元年秋八月成於二年之二月郡人具官袁楠記

浙東廉訪司重建澄清堂記

國家肇置肅政廉訪司浙之東以婺女爲總治而行部使者凡六人讞審殿黜循歷于六郡總治之使二人坐鎮于婺六郡歲終必以其成牘歸于總治定其可否以上于御史臺持綜覈之實執與奪之柄厥任實不輕矣夫以輿地之廣貢賦之夥天子不能以自治必假於守令焉守令不能以公其心又假於耳目焉以重其寄大其居室聳其視瞻廉遠堂高非直爲觀美也聽事之所繇唐歷宋歲久頽剝不治至治二年中奉大夫馬公爲使于是邦顧瞻改容曰茲不可不爲先務邦之耄倪亦曰茲實聽政之本於是郡請于中書行省計郡餘財以爲匠費崇其堂隍稍北以構柱鬩孔新庭廡邃密名之曰澄清復爲燕居之室于其後曰迎華觀經始於是年之九月明年五月告成中奉拜湖廣行省參知政事以去資善大夫思蘭公甫至則曰中奉公之惠後若是宜紀其事未幾拜南臺中丞資政大夫岳烈公繼爲使亦曰是誠不可軼於是僉命掬爲之記中奉資政嘗牧于吾鄉皆得而接識往會中奉公于京師謂余曰民之多寃繇循行者不盡其辭吾往浙東將使六郡之苛癘亦切於吾身後聞其所行果有所

不避資政公廉而守正牧民如己子遺愛于四明人能言之中丞公得見于會通河議論冰雪以刺劾爲己任是則三公之行事深有合夫至公之論抑又聞之事患有所不明知而有所舉籍籍于道塗之民口不可以防也苟明矣不少怨焉則法舉而德不足以化今使者五人皆遴選在位于以見聖上振整之初政登斯堂也則相與講習見於施設不齟以避不苛以求陽煦陰肅吏民率服胥保惠以承于上其治豈不偉哉夫志同議同任事同七郡之民孰不鼓舞以嘯詠太平之感脩舊職太史慕前賢壁記警戒之實因以謏聞而爲之辭

明遠堂記

澄清堂成紀興繕之本末矣參政馬公奉聖天子明詔巡行江浙復至婺女見其燕居之堂舊曰迎華觀者而更其名曰明遠取其切于觀風之道副使馬公經歷俎君冕復求記於余於是屬筆爲之辭曰今夫七郡之黜劾悉萃於澄清吏抱其牘雁鶩以進卒不敢妄議其可否將求其生欲重其罰情皆不能以得也精思以究必退省焉以品節之事窘於一庭而智足以見萬里古之善馭吏

者不泥於法律不事於朱墨故其革姦警饜無言而化成必有其本也在昔聖人明目達聰百僚在官定於三載之考績夫豈有他哉維東浙負山聯海風俗不一強者雜譏詐柔者率罷軟撫摩之道各有攸處登斯堂也必攝齋肅容悉議其所宜行退于燕居申申天天燭照數計考七郡之幽隱如指諸掌名之曰明遠孰曰不宜今參政公之按行非家至而戶到也是則明遠之旨講之熟矣則凡後之來者益得以省察俾勿壞泰定三年四月丁丑具官袁桷記

新修司獄司記

國朝肇置司獄司專以掌守囚禁職卑而勞猥爲其官常憤憤不得志浮湛坐曹日數歲月希善代謁吏部者每請託求免注繇是視爲傳舍狴犴之不修桎梏之不整所至皆是憲部審決亦有所不暇及簡漏相仍其勢然也永嘉林君龍澤之來守是官也曰吾不可不自振考其成牘剔疑擿姦重者上憲府輕者白郡守多有所變易罪以不寃囚民宜之久之曰獄不可不繕營至大二年獄旣燬支弊植仆僅存其制於是除地撤瓦築堂三楹曰平恕堂後燕室曰種德

左右翼軒環以吏廡迺築高門迺闢園土養疾有堂奉神有祠繚以瓦垣浚以甘井取足備具各中繩墨蓋先之以己俸而官若民迺悉爲之助不旬月而告成噫亦難矣昔人言不卑小官於林君見之州縣疑獄郡輒以委林君揣情以求其生量事以正其罪羣吏抱案詣庭下無虛日是則林君之果能令官大也書曰典獄非訖于威惟訖于富若是則寧有私謁者乎余直集賢林君時爲掾史處事立具今覩其政績顯白足可稱道庸紀歲月是役也興于某年某月成於某年某月泰定三年歲在丙寅郡人具官袁楠記

慈溪縣興造記

泰定二年冬十一月保定孫公楫循行四明至于慈溪覩其縣治壯麗整密咨嗟徘徊詢諸縣人邑長爲誰咸曰此昔烏忠顯之所成也忠顯爲縣首治董孝子祠以化俗次修孔子廟三皇祠曰儒以長民醫以養民又治社壇嚴其齋宿以謹水旱迺曰迎詔禮賓茲不可不虔傳驛休息宜慎其寒燠興繕旣畢始曰吾亦得以廣居于是矣語未終孫公曰是誠可紀載於是命進士翁心傳爲圖

俾桷爲之記聽事五楹高其前三楹焉堂曰清清淳化中尹張叔達璽書之所
襄因其名而築之者也挾以吏舍廚福獄室縣門鼓樓前後有序縣治之後有
小湖湖之中爲洲花竹四列風蓮水柳暎翳繚繞爲亭以庀其居有四曰思政
佐治以察民隱也曰柳意勝覽以樂其神觀也圖旣畢復言忠顯之政墾萊輯
亡役不病於民去其姦饕以爲政本今其去十有三年思如一日而其繕營足
以支永久於是有驗噫今之爲縣嘗患夫土豪之控持也其始也利以誘之終
三年更徵需斂散一聽其命戶稅更易拱手莫與之抗甚者爲之囊橐可哀也
已孫公之來茲邑也其亦有所感表去尹之美亦將以警夫來者余昔在太史
觀循吏之實書以示後忠顯不求名而名自至孫公之爲使者夫豈計目前以
爲黜陟哉始忠顯之滌篆也漫不可考謹視之實穉歸縣印言於攸司而更正
之其精覈率類是則凡今之爲縣者廣使者之用心以成其政績桷雖老尙當
記之泰定二年歲在乙丑冬十有二月甲午郡人具官袁桷記

定海爲縣南接蠻島汪洋數千里食息可至厥今號爲重屯四方語言咿嚶侏
離交衢旁午褰衣儒冠見者訾議考諸郡乘惟沈端憲一人嗣後接武猶班班
可考泰定二年春某官始來爲令迺曰縣固有學學必聚書冥行空言講習何
補武城弦歌先聖是取進鄉小民首於文辭其必自聚書始迺與主簿龐君首
捐俸資復命教諭汪宗江出學粟俾儒職樊惟肖胡驥絲杭置經史若干卷又
諭學之耆老曰經以窮理史以究成敗廣聞修辭惟子集是宜是亦不可缺復
得若干卷將刻石列目以示永久謁記於余念昔在殿廡見令尹之兄在廡下
察其儀貌莊肅知非凡近後果爲進士第一見令尹于國學儀端語溫審其韻
頗萃于一門今茲掌其邑尤以教學爲己任抑嘗聞之聚書非難寶書爲難校
官之不職悉資以奉權貴甚者竊其故籍挾之以逃其最甚者漫漶散落一不
掛眼三者之病比比皆是今刻于石將杜其漸後之來者寧得不自勉乎

慶元路重修先聖廟記

河南郭侯視郡事之初首定役法郡民日困嗾事旬月按覈數嘗不登郭侯知

其姦利迺言曰病在私商潛轉輸其所贏餘卒不入公籍民病不可藥也於是
罷買區分四廂俾總之鱸醢鼓脯各趨其時視計口之授略相等復竦然曰吾
職司學校茲曷可少緩督大小學謹授業斥其僞冒以其餘粟大修孔子廟於
是進郡博士陸晉之學正錄胡某毛某而言曰漢文翁立學歷唐宋幾二千年
猶完緻君等知其故乎少間曰教在不墜其不廢在繕修迺曰若殿若儀門風
雨剝圯在丹牖先聖崇嚴列祀肅雝在作繪定章服在禮象又曰講有堂書有
樓吾亦曷敢後姑徐爲之吾願俾是邦服習仁義秀又林立遣詣王朝將自
茲始桷絲禁署歸里凡三年愛中和樂職之詩首爲詩以詠贊侯名郁字文卿
所至官以興學爲本詩曰

茫茫海甸聿仁義邦圭組積榮失其敦厯歲亦云徂夸侈則降維侯之來靡瘳
不知曰維洋宮風化攸基竦其具瞻象神之儀藻并繪櫺絢兮承式降陟有嚴
是奉是翼匪土木之工職教攸則瞻彼戟門有飛戾止斯暈煌煌五采屬纒鏘
鏘八音粲曰在耳嗟爾後生無媮以誕無逸豫伴奭遵我侯度以靖以獻奉璋

有峨伊侯之願

鄞縣學興造記

延祐元年楠記鄞學之興造矣甫一紀職鄞學者括蒼林君傳以事狀來言昔之經度踰於舊址廩入不給故其結構塗墍缺焉未周鄞之尹曰阮君周翰治縣未幾有恪殿謁首以興繕爲急割俸以勵儒生於是步履有甃繚繞有墉龔以密石華以堊丹象設有嚴講席齋廬足以稱弦誦而從祀一百有五悉易以塑合儒先之宜祀者爲祠以庶少間曰旣完矣盍廣教以振士類立小學師二人而增弟子員凡五十人泰定三年二月朔告成復命楠記維鄞自王文公延杜先生以君師爲端本故後之繼承經術淵懿蹇蹇大節見於史傳者凡數公衣冠日隆微近功利而懷忠抱德盛於乾道淳熙之際遺言正學傳於今猶未泯周翰之先公嘗分刺是邦履眉褒衣諸老森立蓋嘗極尊賢之禮矣今茲作新亦將有意夫斯道考問德業吾猶以爲有在也周翰名申之池陽人林君字以道非怠其職以苟度者於是乎見魯公修宮形於歌頌系以詩曰

維艸之峯煌煌金精其江縈紆挾城以行磅礴元化孕茲羣英其英伊何鬱彼
瑚璉不戚施以求是則是憲發其精忠匪石可轉曰尹之來庭誥是遵顧瞻廟
廷風墮雨昏土金丹漆有炳其文宮既完矣失教則缺循循子佩自今以始罔
敢越以道氏林葺構揭揭杜先之訓百世服膺有失其猷將夸誕是與凡升論
堂戰兢以承

清容居士集卷第十八

維宋清容居士集卷第十八
清容居士集卷第十八

清容居士集卷第十九

元 袁 桷 撰

二記

馬元帥防倭記

自昔待蠻夷之國必傳詔令以諭說之稍失撫馭則狙詐百出甚者嗜錙銖之甘傾接如素所交往失上國體箴侮訕笑於茲有年矣今天子考獻令於疆域中書省奏曰蠻夷之不庭實守禦長吏餌利忘公弊不可日長維定海實慶元屬縣附海司鎮遏遵考舊蹟茲其爲泊艤之所舶有定制輸其物以上于官勿入郡城勿止貿易則得以永遠虛聲生疑駱驛傳騎亡益也是宜選帥臣清白有譽望者制置其事上可其奏泰定二年冬十月倭人以舟至海口於是行省僉曰非馬公孰得當是選公乘驛至縣卽宣諭上意始疑駭不肯承命反復申論訖如教於是整官軍合四部以一號召列邏船以示備禦戢科調減驕從除征商之姦嚴巡警之實慮民之投憲爲文以諭收其帆櫓器械而舶法卒不敢

移減自便事既畢買區市虛陳列分錯咿嚶爭奇踏歌轉舞川后山君德色效靈而公之淵思曲畫若防之制水不可得以殫述自始訖終凡一百三十有七日古之禦邊莫踰於諸葛武侯韋臯善繼史有述焉今公創始於前願後之賢帥規隨以成非惟鄉里之奠安則國家懷來將自茲始王會之篇楠願有繼焉

兩浙轉運鹽使分司記

國朝定煮海之賦倍於前代邦用是資其選官委任爲不輕兩浙設總司於杭東西屬郡率置分司以董督四明號爲東浙繁夥饑饉薦罹逋負益廣急之則疲蕭愁歎薰色骨立見於牽稚故受其任者爲最難楠官翰林時預議中書堂嘗白丞相乞減歲額丞相領其議于時大臣咸然其說卒以戶部籍不能易是後憂國者迄減其直繼今善謀邦計之士亦將有以待也泰定元年冬分司燬三年張侯伯威莅是邦以官楮若干委于郡守郭侯曰茲役不可緩必擇善於營繕者是屬曰阮君申之縣庠之興尹能紹之曰尉周君一夔尉廨久湮尉能起之茲其以是屬僉謀曰取於山里胥是刪鬻於市大賈以喜將視其材市

於民堅完縝密是則不負於郭侯之教矣六月闢工九月告成聽事崇嚴夾舍拱揖門臺有敘百堵具列斧斤鑿鼓不徹于垣周君則曰尉雖不才罔圖之設非我職矧轉運府設是則益以病盡去諸復以楮之餘者歸于司官常患不得其人急奉於公怨讟滋興況復因之以竊其利周君則不然人皆曰作之登登周君是承去其榜笞民完以熙若是則任其職者絕叫囂息追逮其賦寧有不登于天府昔之使者遺愛揭於堅珉矣後之來者登斯堂也藹然仁政將屢書不絕楨老矣尙當見之泰定四年二月庚寅具官袁楠記

鄞縣小溪巡檢司記

城南門折行四十五里曰小溪鎮宋元豐置焉唐曰光溪鎮以監酒稅煙火得名治平元年罷酒稅以便民獨掌煙火凡言煙火職民訟水火盜賊其地三境交接大江貫其中羣溪畢會水清泠如明鏡巖巒擁秀千篙競發碧瓦朱甍聳聳鱗比望之如神仙居宋紹興中北客多樂居之魏文節公結圃墅與客大梁張武子爲詩友其它如安儀同孫王尙書相繼卜築而爲是鎮者于于養恬承

接履舄爭鬪絕庭下桷幼歲舟至溪上猶能記髣髴也皇朝一海寓立巡檢司
于是地而舊鎮久廢故家亦湮沒毀散仕者率苟循歲月處隘踵陋不復以崇
嚴爲事泰定元年白君察罕不花莅是職與父老言曰司徼之所不在荒寂則
在曠惡吾獨愛是溪有先賢之遺俗薪者販者前歌後休絕袍鼓之警罷干楬
之邏吾心固勤焉亦是土循謹之素願廣聽事以表茲溪咸曰然於是木踵以
至甃效以來三年夏闢工九月告成遠迎龍湫近接虹梁舉解以落而懷牒巧
訟者各屏息以避有合夫道德齊禮之義迺相與歌曰

作之烝烝罔聞其聲養其高明心清以寧不卑其官惟後來是承

吳江重建長橋記

震澤東受羣川汪洋巨浸至吳江尤廣衍地爲南北衝千帆競發駛風怒濤春
擊噴薄一失便利莫能制唐刺史王仲舒築石堤以順牽挽宋慶曆八年邑宰
李問始造長橋繇是各捨舟以途來往若織水齧木腐歲一治葺益爲民病泰
定元年冬州判官張君顯祖始莅事曰茲實首政稽工程財莫知攸出當謀於

民民有調役維浮屠善計度長衢廣殿瞬息以具吾語諸其有獲廣濟僧崇敬
實來敬言伐木爲梁弗克支遠易以石其迄有濟參知政事馬思忽公以督運
至吳迺采其議周詢以籌首捐貲以勸敬復曰作事謀始不可不慎有善士姚
嘉禾人能任大工役必屈以委繪圖相攸經畫畢具咸服姚議於是參政
諉郡守郭侯鵬翼役未興丞相答刺罕公朝京師迴道繇吳江郡白橋議丞相
曰吾必首倡卽捐萬緡而府縣士民相胥以勸平章高公貫公繇湖廣江西來
自江浙力囑張君俾終是工杜侯貞來守是土亦曰張之言然閏正月建橋明
年二月橋成長一千三百尺有奇捷以巨石下達層淵積石旣高環若半月爲
梁六十有一釭其剽悍廣中三梁爲丈三百以通巨舟層欄後窺危柱轟轟
以文甃過者如席舊有亭名垂虹周遭嵯峨因名以增榮觀焉是役也敬師鳩
徒輸財實三之二贏財十萬復以爲寶帶橋助姚總其綱張君首議出於仁政
事有脗合而是州興役見知於丞相誠出大幸厥今運舟相聯驛使旁午咸曰
丞相謀國經遠張君美績繇是得書將永遠無極繫之以詩曰

茫茫禹甸昔鄰於魚維四載功茲爲具區有失其防羣螻喁喁曰維李侯構茲虹梁經始孔艱任負揚揚歲老水泐臨履若驚張君莅官飭我初政曰茲橋匪脩涉者益病召彼耆老貨布莫競相國之來六轡徐徐詢事審宜以究以圖割其緡錢俾民樂輸橋旣成矣虹飛于江千柱承宇羣流迴砥儼兮層城爛其軒窗張君籌思相國成之彼清淨士式克承之千歲永賴我庸以銘之

陸氏捨田記

吳越舊俗敬事鬼神後千餘年爭崇尙浮屠老子學棟蘆徧郡縣宋帝南渡公卿大臣多出兩浙而制令入政府得建宮院崇祖禰驅石輦木空巖闕寂之地高下晃曜財日益耗而弊莫可救矣故稍自給足者亦承風效施跬步瞬目日不勝其繁吁可禁哉宋社亡故家日降辱過昔所崇建揮手若不相識甚者翦夷其墓田豚蹄之祭不通於焜蒿而卒未有能懲戒夫厲階於初其習聞者不變故雖善說巧譬終莫能以改也夫錫山陸元俊以其母夫人楊氏捨田之狀且告曰陸故吳望族大父凱恬靜絕企鶩觀老子書若有得所與交多聞人是

生先府君愈孝謹自治讀司馬公書不釋手人勸之仕則曰吾承事於家者未至安能弊內以益外哉未幾大父母相繼卒吾府君拮据治窳窳不幸以毀卒又不幸弟鐵孫卒於是吾母曰爲物爲變魂之屈而不能伸者也氣化則魂升求於家祭記禮者盡之矣求於窆冥則莫若清淨焉是依汝父若弟其往也無悔而吾惓惓者情有盡而哀終身不可以有盡也今將割田若干歸于城北之洞虛觀以廣其時思吾知守禮者矜其情而曲許之焉事不永久則吾之志墮當求能文詞者爲之傳其文傳田不復可易矣田不可易則汝父弟與吾志俱不朽矣其言若是俾余信其言者吾友陽穀李君希哲也希哲於陸母爲姻聯善屬文遜於予者求徵以示公也儆其子孫而余前言惓惓復將以儆夫觀中之徒知以輿言爲可畏也袁楠記

野月觀記

養生說有二焉北祖全真其學首以耐勞苦力耕作故凡居處服食非其所自爲不敢享蓬垢疏糲絕憂患慕羨人所不堪者能安之調伏攝持將以復其性

死生壽夭泊然無繫念駸駸乎竺乾氏之學矣東南師魏伯陽其傳以不死爲宗本於黃帝韜精鍊形御六氣以游夫萬物之表其壽命益長者謂之仙而所傳確有派繫先儒深有取焉夫人之所受爲命其天閔戕賊必不能盡其年過於厚者非自裕也盡性知天踐形以全其正斯二者俱得之矣天台多羽人居遺跡勝所相望不絕宋世有大梁趙公宗卿某佐縣黃巖樂而家焉踰二百年子孫益繁衍詩書孝友簪笏不絕於家乘四世孫與慶虛中父遜世樂道從北方之學者而慕之志彊氣堅脅不至席今踰十年矣遂築室委羽山之西北入牖四房兩翼三楹靚深以明于以坐忘不知寒暑之代謝順其天年以入於自然者也而名之曰野月焉月猶身也則而象之者得無似乎吾按其圖東西仙源南企大有北顧商丘誠仙人棲息之所境清則神湛嘗聞張平叔產是州王子晉居桐柏山二人皆以不死傳信盡性可以至命虛中得至靜之說願取平叔書讀之將見王子而肅之矣道無異同不偏於一者則盡善楠也行南歸願踵門請其說尙當賦之至治元年九月四明袁楠記

沖庵記

御史臺都事開封賈君華甫以沖名其居謂袁桷曰爲我敷繹而記之余於易先後天之說精思以求而嘗得其說焉沖漠無迹易之初也二儀定位其氣果有分哉是氣也陰陽得之則爲日月星辰爲河漢爲山嶽凝而瑞於世爲甘露爲慶雲形而在下四靈連理之應係焉其於人也受中以生則與天地之未判同也曰生矣氣亦果有分哉曰寂然者初之未始離者也感以應不動乎內者也心君清寧行乎六氣而不侈處乎寒暑而無背則中和者內外之樞紐也昔之聖人言夫上者爲道下者爲器變通事業允屬夫人若是則全其大和以養吾生休休焉復奚遜焉存誠以立乾之本也持敬以直坤之本也聖人惓惓致辭焉陰陽之用備矣氣生於無形成於有形聚散反復晝夜不置勸哉勉夫將不能以病矣華甫官京師踰二十年踐歷清劇其於事物也充然若迎刃與人交謙以善防臧否之色絕顏面而損益高下各有攸當是其養之有素外不能動者矣其名曰沖不幾似夫華甫竦然曰唯遂爲之記

順堂記

大德八年余與天台陳君剛中爲翰林屬剛中素簡曠不耐酬接獨其族子萬里裨益俛仰客至能使盡歡禮洽而氣和真翩翩良子弟也家居于台之三台山之下凡十有一世宋世第科目聲譽序代有其人焉古之言令族必曰荀陳曰王謝非貴華腴也薰德以爲善積小以爲高絕於聲音笑貌篤躬以行者斯近矣萬里三游京師未嘗不與之言齊家修身察其所養益充厚調官以歸謂余曰違築堂以奉吾母兄弟三人而仲弟居于外今將挽之以歸抑反身而思之我不能和協以至於是邪則又曰違其母以妻孥之私若是邪昔之歌常棣之詩情義之曲盡焉者也而夫子蔽之曰順願則順焉其殆庶幾矣桷曰天地以順動不順爲逆焉字于辰爲震爲孽春秋紀之順天地之經義者孝之本矣陳仲子喻於槁壤世人行事不若仲子則升斯堂油然而以興不遠而復何憂焉化由身始蓋何病焉爲之歌曰

彼山嶺岼孰啓源兮世十有一嗣宗蕃兮木之詵詵本可分兮謂本可分兮枝

曷以存季也孔艱憂心薰兮伯也鬱陶求于原兮歸來歸來兮我母永歡兮

積慶堂記

往歲朝廷廣錫類之澤於中外繇是執政大臣得追榮其三世今集賢大學士平章大慈公時爲翰林承旨捧制書告于厥曾暨祖考惕然以思曰嗣子守先緒敬篤弗敢替陟降帝廷嘉惠日接靡有間茲惟前人寵綏功我康懿公潛光葆真植德在拱把至安惠公封樹益虔美蔭磅礴蓄久而未振逮先考文敏公則亦旁達秀發聞譽光灼矣然祿弗稱其報今膺是穹顯居室完好弗先烈是思曷稱永久遂扁其堂曰積慶有取於坤之文言如臨如存知所以近天子之光者實有攸自桷也獲殿文集賢得升公之堂而俾有言焉古之能孝者食息跬步不忘其本而詩人之推原則亦曰孝孫有慶是皆其先祖之徂賚夫源深則流長恃而不浚將壅焉以竭譬之善賈貨殖之積所從來久矣因其饒而日取之用殆有盡今平章公朝夕承顧問委心微言觸類以感悟廣聞以通導善經達權以天下休戚爲己任所陳於上者外雖不能知覩命名之意若堂焉以

珍傲宋版印
構播焉以穫寶崇乃先公之德以垂裕於萬子孫毋怠則凡登斯堂者亦將倣以尊祖河潤九里夫豈徒言乎哉

樂全齋記

真定李君允希微甫故儒家幼慕冲曠閱其游記曰登恆山聆天雞觀出日焉遵太行上王屋山嵩華少室視昔時好奇之士遺蹟鑱刻悲愉怪愕歷歷在目而徼福頌語何侈愚也南踰江淮地險不足恃矣震澤禹功能知尊之錢塘故王都鷲溽靡習未有改遂窺禹穴望蓬萊久之歷天台赤城知孫興公司馬承禎肥遯益有旨武夷九曲其仙者誠然與道統之傳有自矣過九江審潞匯之本匡山之截乎長江者非偶然也衡山爲南嶽潯山望祭抑深疑之氣舒而神完則曰吾於鍾山其止乎遂日廣松竹桃杏鼎壺几硯之屬于以娛其客且益以自佚鍾山故衣冠之所僑寓也繇晉以南名士居焉今將居是丘以樂之爲何如益展其地曰山房堂曰靜脩齋曰樂全軒曰松風而命其樂全者俾余記余嘗悲好游之士名足以成矣文足以傳矣而不能全其身蓋其沈恣養恃

才以肆危機駭浪蹈之而莫知遇事瓦解其悔恨悼惜若無所容其生非若夫子之宋之陳之衛之不過蓋德以輔名道以喻志舍是則非以自豫也希微生盛明之世居于中州以仕焉若水達于川孰能禦遏今而曰卜居于南土豈託而逃者與余居京師見持政柄者皆善思索位置遇大利害輒執咎不能解而南士以疏遠得免希微之居南夫豈遂其靜退與抑亦耳目之所接有感而然與遂爲之辭曰

容容鍾山霸基承兮英光盪摩隱德貞兮泉纒纒兮玉鈴松搖搖兮翠旌維絜士之定居兮山神憺兮以受令兮合正命兮萬化成神無方兮養千齡

竹鳳石屏記

繇開平西南行七百里稍折西北其地有泉如懸簾五色貫射在昔世祖皇帝名之曰三不刺以其國語志之也地曠衍均成沙居民鮮少地所宜惟瓜悉發南戍卒墾樹之瓜絕甘美按燉煌多種瓜沙土疏利根蔓善達分水無沮洳昔常以江漢人廣其田號會稽其事政相似至治元年今天子巡北邊望祭陵寢

昭文館學士史公以屬車從旄旂交章鼓柝傳警頓次之暇則詢其遺俗千里一色林光野燒絕不接目睫怪石犬牙層獻迭見遂得一屏若水玉澄澈雲根屹成巖岬雕鏤其上有叢竹森列旁出一木綠葉密成前隱采鳳迴味導前以飛五采紛敷不假於琢削而生意屈曲造物有以畀之者因名之曰竹梧來鳳爲圖以紀之余嘗聞地之宜於五穀者男女必繁夥充斥盡力以食其土若夫絕漠廣域其寶玉光怪不可名狀而其人類寡鮮得非天地之氣其凝結者爲星辰爲河嶽其聖其賢者爲君師以長牧之至於不能以自見者則萃其精明剛絜之質以伏于荒野一得所遭而其緹襲纒薦又甚於他好豈不幸哉方今天子寶賢飭躬以孚佑于下民茲石之瑞和氣之感與抑亦開太平之應以告成于天與史公往在至元間從大帝出征嘗得二石中空如壘出虛成奏其一具北斗形余嘗聞史公好養生說玉石吾寶視於內者何如也至治三年三月

袁樞記

曰生堂記

天台道士項君子虛通岐黃書其治病不擇富貧輒徒步以往處藥候脈有源委蓋所居鄉有老醫能理傷寒受其說傷寒首經絡未有不通是而能爲醫者治所居室名之以曰生且求記於余噫今之醫未嘗不以生爲心也技薄而學淺貿貿然以游人之門恣意剖決遂使夫人之壽夭不得以盡其正命十蓋有五六者焉薄人之危剛燥疏補重其疾以利厚貲則凡所謂生者不存於其心矣天地之於品物寒暑代謝日用而不能以知爲之君師以正其綱常爲之醫以療其疾病是醫之道其贊化育者厥功茂著仁爲人心操存動止於醫殆得其全矣余嘗聞道家者言陶弘景增本草飛走蟲魚類例有殺生心此蓋誘俗鄙俚之論犧牲養人千萬世不能以易藝不如古人挾一囊以自行巢氏之說畢具於所挾矯誣滋甚矧有若予前所言者其爲醫之禍最速矣子虛氣正而色剛立志不苟視財帛如糞土耐習勞苦師全真之說養心若保赤子其未通者必有以日廣活人愈多仰俯不忤斯其爲德也大矣庸俟以紀至治三年九月

袁桷記

信州貴溪縣楊林橋記

貴溪環山爲縣大溪貫其中支流爲楊林秋夏水至奔瀆莫能禦歲病涉焉當淳熙年有僧允懷任其事懷陸出也象山文安公勉之曰徒扛輿梁觀政之本是則昔時感平轉輸供調之勞守令有所不暇及矣考於成周除成梁道於先王之財賄不用役民之法其無迺因其隙而用之故不煩於官者良有以也二千年來著律令者長吏率遵守文具飾傳舍除驛道爲急使者所弗至不復計省民所必趨而顛受其害於是乎有倡義者焉懼其嗇於財也則復有利益之說焉噫民之所利上所當與顧其力有不能事與勢實有違者夫豈惟今也哉龍虎山爲老子祖宮其民食其業以游於襄陝廣蜀歲幾萬人而江淮復不與道繇楊林咸惴惴焉求於上則有未及謀於私則曰亦盍思以爲永久於是山之道士曰傳某章某首出資以倡之主茲山者董某曰事宜是鄉之耆老某亦曰吾等詎坐視遂伐木聚石聳爲飛梁危湍駛流帖俯於履轍之下訖成於至治元年十有一月明年董君襲常來京師命余以記余讀老子之書曰修之鄉

德迺長又曰儉故能廣刻志繕行則其自貶損者夫豈厚生以自養民困於徭役牧之者不能以告于上因令所著而強之將轉散而他往清淨之學不有衛翊其何以爲教三君子之志深且遠永詔後之來楊林之橋其何有廢焉

小領水亭記

薛君玄卿自京師歸上清二年矣習靜修德日治其文詞刊落雕飾以求進于道暇日游小領領分爲兩側足以上過者岌業然龍虎山爲治所其教行南北故凡驛騎之旁午商賈之輻湊皆本於龍虎而道必繇於小領玄卿坐其旁見行者之至是皆假以憩息良憫其勞貴賤固一等也遂築館于領之西曰崇賢作亭于領之東曰振衣命道人曰具茗水承接以休其心昔之善喻者曰夸父逐日而不返今世汲汲然道途者皆夸父也故其捫歷河漢而不憚困阨蠻瘴而不懼方其去鄉里辭妻子漠然無惘惘之色其羈窮逆旅饘粥藥餌之不給而猶曰我有命焉奚以憂至於久勞而思逸者登茲領然者未嘗不心一而念同當是時使幡然有得吾知其絕跡於是途必矣玄卿曰領之東古象山陸文

安公講道之地其西爲臺山突兀秀峙南爲雲林塵湖聖井琵琶諸峯歷歷可數北則潛山之井邑稠密高下雞犬桑柘望之如神仙居吾知夫仕焉而已登茲領也必曰吾不復爲人間事矣其善蓄而給足者則曰吾行其少息矣王公貴臣捧香而來于山亦知老子不辱莫先于善退往來鮮少將見夫青牛白鹿之士倚古松而聽流水登斯亭也願爲之執鞭以俟焉斯可矣遂掇其語而爲之文泰定元年正月壬寅清容居士袁桷記

友恭堂記

余幼居鄉合郡里巷考門閥之高者十居其六七焉先公撫余首而言曰自主組之日盛而兄弟之虧有不可勝言者今可稱道惟史忠獻王與汝曾外祖忠宣公白首若一次則曰余忠惠其季尙書貧無副衣出入互易貴且死也約同葬尙書之子寺丞不替是道以京秩讓其弟所後子二百年來登顯仕亡慮數十姓中外宦簿俱徧歷獨號能安兄弟道爲難蓋其貴盛之極勢軋於相等稍避嫌以退則若無所容其身以爲吾才不能以見用者兄弟使然也不再傳而

其祖父之所蓄棟積稔聚各私利其美好黨署賓客強凌很勝歲時敘昭穆占對簡略觴豆不設強成禮卽退言至是良可哀也又曰吾之事賓州汝雖嫡長讓其爵於兄子凡世所慕好吾一不以問怡色拱立若幼子弟積誠以感遂悔焉而益以親汝以孤子承吾宗何憂焉若有子孫衆多能率我以行則知吾門殆未艾也受其言于今四十年余官集賢日近醫藥命次子瑾來侍久之復還翰林屢謁告以請不得命長子瓘撤舊室之蠹腐構新堂以俟歸書屢至將以盡侍養之道余曰父子異宮兄弟同處古之制也幸有尙書公之堂在可以逸老則斯堂若兄弟居之誠宜遂名曰友恭實取夫先公之遺訓焉夫爲公侯之後得爲幸矣恣其私心以泯夫天倫氓隸之所不忍因詩書而成衣冠不幸不勝衣冠而卒泯其詩書則昔之高門今不能一二者其病首在是越公之書在山中而余再世之積實倍焉二子能讀而守之又將見吾諸孫之有成而翁授首之泰定元年 月 日清容居士記

種德堂記

蔡侯茂先以其先郡侯之狀求銘撫其行事古君子也少間謁余爲種德堂記其名實侯崇祖之本意昭揭于戶冊者集賢大學士郭公安道之所篆而歌詠其事以光顯悉余同院之故人也若是則余何敢辭郡侯之樹德蓋不止於誌銘之所紀而因事以詠則宜有取於行實昔人有言陰德猶耳鳴想其平居篤厚廣施於鄉惻然以求其急難御於家也敏其力者賞之不足者周之懼飭躬之未能蚤夜以思則曰所求合乎古未能也蘄正乎有道之士則曰吾所爲能盡善邪燭計利害得無慊邪施於族者洽於肌髓與訓於家者蹈履足以日化與朝培而夕脩望歲焉不求報豐養之以年祝之於子期之於孫磅礴浸漬斯其爲種德之本旨也茂先今爲良二千石其季爲太守鸞翥鶴峙羽儀清朝盡忠補過以光其祖父吾知其曾雲少者謹于里門長者服于王庭恂恂孝慎日補其未備考其興隆與德良未艾也書曰率乃祖考之攸行又曰汝克昭乃顯祖願相與勉摘也亦從是得以有益焉泰定元年冬十月甲子四明袁桷記

翰林院都事韓君友謙居京師有年矣往歲築堂以奉其母夫人未幾下世今復名其堂曰春暉示不忘初也命余記其事焉孟子生於戰國距舜之時幾二千餘載矣而其言終身之慕者則必曰惟舜一人焉耳矣昔之聖人懼其不能皆然也爲之令以教之爲之表以勸之而作史者復取其卓異者以彰明之教益詳而行益微吁可歎也矣孝根於心人之所同繇古而論宜不若是薄然而缺焉所從來久立其名者良有以也杯圈手澤存而不察非孝之實吾知夫韓君之升斯堂也雞鳴則思其進盥之儀饋食以列則思其嗜好之若初將惕然而奉之日入而息陳其枕簟閣乎其有聞也故其居於家也望之而在前思之而若著其處於鄉也身無虧焉言無擇焉鄉之老者曰韓氏之澤有在矣其先人之教未忘也立於班朝無有父母兢兢若臨于其側而人始曰若是者其殆幾於永慕矣吾聞友謙佐治大尹執禮自持不爲苛刻矯亢人安其業而化俗敦教飢渴之於飲食義方之訓有自來矣昔孟氏之子於其羈愁困窮之際始矢於言情之感也友謙仕不離鄉遭世隆平卒取其言感之正也楨也官于朝

七稔矣升春暉之堂得無愧乎

賀蘭堂記

靈武李公居錢塘三十年築其第之堂而名曰賀蘭志不忘本也會楠自京師還迺命誌之楠嘗紬書于太史按賀蘭山在靈武保靜縣西草木青白望之如駁馬然者土音語駁爲賀蘭而昔之居是山者復因以爲姓在唐天寶時靈武號要衝後卒能以一旅之衆興復舊業至李王有其地天下易代凡九姓獨靈武以十餘州相傳者三百餘年其民沈鷺尙勇土壤沃曠氈酪駝馬給足無凶歎國狹而慮密各以金革相保衛患難垂乏絕不少變精急專一迄能奉其君長蓋傳愈久則俗愈定太祖皇帝經略西土爲武功首靈夏舊地始臣服委質然猶強節好義策殊勳受上賞者史不絕書李公之仕於江南也常兢兢然惠綏不忍侮其鰥寡而其於浙東也事若有素今所領七郡四爲其守矣風俗燬惡皆示諸掌而惓惓思於賀蘭者亦將有以振夫萎薶之習使吳越之士如吾賀蘭者斯可矣古者氏族之別必錫于其土雖遠處他邑其不紊殺者因是以

有考賀蘭之山承平日滋昔時之草木意其豐茸嘉美當盛于公去鄉里之日而斯堂之封植五采交錯密然成文者心猶以爲賀蘭也食必祭先耕則祭嗇斯須不敢遺其初種德崇報有開必先以似以續殆將見之公其以余言爲徵也

沈香石記

唐虞之時曷有玩其耳目哉余讀貢書至青州則有怪石者焉今文登諸島洲往往掇拾珍怪置几席間物易得而可喜則雖聖人是誠有所不廢矣浙東括蒼山松化爲石其文理真如松或曰踰千年迺爾人爲至靈其化之不可測也爲聖焉爲神焉受成而不變者木與石至積之歲月則貫射於日星磅礴於霜露光怪駭愕充然黝然爲珀爲玉有不可悉名者矣嘉穀爲莠穡夫憂之鷹之爲鳩橘之爲枳其遷之若是則亦有美惡存於其中焉京城田舜舉爲太醫院屬治其燕居明絮覲幽得一石望之如水沈樛結宛轉巖罅刻削薦以文石過者咸以爲海南土產也似是而非其爲怪石也奚以疑故變至於道君子之所

勉子盡慎諸

樂善堂記

雲間繇魏晉以降多文人磅礴秀絜故其言辭幽麗瑰雅喻物形狀無留遁常驚動海宇是其人誠精於言者也或曰其地介海挾江波濤魚龍善噴薄變化人居其中者成似之宋世文儒益光顯冠帶相望數十年來習始變舟楫極蠻島奇貨善物往往充上國力事生產廣田侈居擬於王侯而仕者亦爭願食於其七夫事久則變變則迭爲乘除因其見聞上之人寧有不遏其萌芽定其準式者與惟烏溪趙質夫之居於鄉也悃悃以無營恂恂里閭足不踐公府汰其侈華日安於平素其鄉人之不善者避之嘗曰積豪以希富富不能永也積書以教子吾其盡心焉勸之仕不能動苟利於人者誠求之泉石以爲腴德充以完嗒然忘世其樂道肥遯焉者歟未幾其子庭芝登進士第人始有言曰是殆將復其初矣昔故多文物不幸爲大家以財雄是其地氣厚積之使然也趙君不屑意焉於是以儒名抑進之則必以文顯文與行相須以成余嘗上庭芝之

文於殿廷繇是以求之探源泝流苟不止則其學益粹聲聞之遠無疑矣庭芝
詣門曰嚴君以樂善名堂願有記退而詢諸其往來遂以行事爲之記質夫名
宗文大父以積善聞于鄉樂善之義祖是

亦樂齋記

永嘉陳子敬客京師居城南東隅車輪馬蹄之聲奔激若雷雹大雨泥淖入數
尺買區豕圈參錯啾唧土俗雜南北不可辨入子敬門槐陰植幢蓋寒苔斑菊
側布疎密清泉滿洗白雲在戶坐者不欲去去者復再至君蒼髯抵掌一榻爲
席顧余而言曰此亦樂齋也高王父宣撫公受薦史太師太師若高外大父舊
家遺德泯然罹變更漆園吏之意爲我終始而言之夸者以愧感者以喟不幾
於道乎桷幼聞長老言君里宅雄甲勝據重樓疏軒旁薄倒景飛鳥怖而海雲
伏也君方少年挾策以自劬漠然其中若不能一朝處稍壯入太學喜名而益
奇蒹葭芙蓉之蕭爽招提磨廡之空絕境寂意冷疾筆落紙自得於杳靄千頃
之外望者知非綺紈世子第而視窻人子復不相似何其盛也今一廢不得復

廢復坐刻畫居京師十年無知己力慷慨引助視重垢積戾頑然持牒爭洗濯
不三宿告去君意氣當復摧抑闡茸而怡然以理勝豈榮觀之旨託焉以自逃
者與屢空晏如榮辱不足以累豆羹見色情怵于內也使向時沈溺自恣卒遇
不遂意宜朝夕弗給又安得爲十年計天乎其成之者至矣噫使果止是耶則
亦無以自樂夫強之而不復必巽德以處太夫人春秋高不能自明寧勿歸也
少貶以求樂於是乎有在陳子勉乎哉慎交而寡言正車于塗其終能有以直
矣

清容居士集卷第十九

清容居士集卷第二十

元祐袁曰桷

記

邵庵記

雍虞伯生界其居之偏爲庵廬焉溫清之隙則怡怡然飽食以歌宴休于中其廬溫密樸質具粹且深中而虛之若璧而環若鑑而明樞闔而扉方闔闔以動止其溫燥也裊以舒其清焉其淒厲也隕以休其和焉左顧右矚神止氣寂晝握其動夜根其靜不巧飾于外據萬物之會將以極其榮觀者焉廬不廣尋丈旁設易圖圖除其卦五十有六瞪而視之首擊而尾應迎而存之風至而水涌審聲遺形益原其情忽然控浮游以上征則搏制控伏囿于其內而不能以自恣或曰非輕世遠舉者不得以專是伯生曰維昔邵先遭時明康玩芳以嬉不激不隨順其隆汙儒者之準也吾將尊其廬曰邵庵何如桷曰可乎哉言無郵乎夫敦厚而靈明者君之先也峻簡而絜精者君之光也自君之出名日以張

莫窮其鄉黽黽然聲音笑貌之學詎昔之志也勉之哉茲廬之制易而不卑簡而不倚其取諸物非鑠我者也由質以成禮無踰矣迺觴以祝之介其休明曰烟烟焜焜維道之門悃悃款款維德之本美哉廬乎足以爲永居乎袁桷記

古劍記

吳成季得劍一于故吳之區窮首以度合周尺二十有一寸下縮而圓人盡其握璣倍於臘東西半焉鐔長五寸有奇口懸三空古飾以琫具者金氣消竭玉質湛湛然望其鋒肅而不劇黝乎以溫如鑑之示明揣其章若冰之在防養其寒光泊焉不知所凝日出而觀則陸離以陳爲丹爲碧起滅於膚理風雨以休之隱隱歷歷欲泄而強抑客曰此何祥也成季曰粵古至人絕世遁逃有不得已則託劍以象五金之精竊陰據陽絲神以成非劍之能也維吾道祖以劍印授受爲漢世遺物傳信可根據劍歸宣和今得于吳吳爲故都庸詎知非昔之所寶且夫化而沈於淵物之靈也返之於山物之完也或曰以神不以形又曰以德不以物形與物其果有變乎袁桷記

昭真山水記

廣信昭真山晉王仙居山祖閩武夷宗爲天冠巖翼行數十里左右扈挾悉至觀迺伏北俯貴溪又正北當縣居中匯泉曰寒月泉與藥池丹井通遵井南鱗瓦削列成廡有泉縣溜廡下拾級以升曰金沙益南至于昇仙臺臺石天設空明無依傳言王仙化是又南石室坐可二十席下視屋邑蟻髮旋縷凡登是山者不盡適不返故冠以逍遙焉上巘爲靈湫逍遙西多故賢居三山品列徐紹宗隱益下北麓陸文安公書堂奠焉循西有吳緬石潛谷巖小隱巖皆以處士著吳緬石形成五嶽復曰五面迤東爲峯二曰老人石人東屈而下得名六學堂以虛名仙足月巖以形名鬼谷以真隱名鬼谷東石壁中穴環好風出湧泉曰風洞輔東益高有石箕瓢器物成琢潭深不測以磔潭名又東極下水鉤盤巖壁削立旌陽許令刺蛟于是唐名曰馨香觀道士祝丹陽繪圖俾志且言其山清刻深古多異石名木歲不識伏日泉品與惠山同自唐李商隱劉大用王荆公毛澤民而下著詠可傳信夫山南爲陽主陽賓陰鍾其所極鬱之而不化

可慕可愕不一以足然神獨嗇之使冲漢者專其靜居絜絜然好游之士少紆其耳目而卒不畀何也世言名山多方外居益以昭真爲信丙午二月袁桷記

東山精舍記

自民迫於生而儒日益病清宗華門淪圯乘接闐然絕環珮聲束裝韞衣方偃伏卻立而甚者貿貿途路間益困苦不復振或以謂升降迭偶之理使然耳噫首是說者其未知所養與予客京師豫章周儀之之甥冷有泰復先辱其游問其年則宜若與昔不接近而甚頌且文予始異之儀之曰不然冷爲分寧故族官簿相接所居曰東山山橫重屏方列若刻其尊正叔治屋一區負山爲居治堂翼然疏沼縈然幽林絜石奇梧秀竹之森爽以繚以屬前拱而導則黃龍幕阜蜿蜒效焉平臯沃畛鱗集備焉朝光夕霏戶牖進而几席納也正叔閉門幾三十年服居士衣設文席講論終日危坐清思無纖芥糲粃時爲詩詞凌厲頓伏索索裂金石舉觴雅歌童稚以敘酬酢揖讓猶昔時衣冠家氣度而卒相避會恍然知爲非人間世也嘗聞正叔舉童子時意功業可拾取今迺摧落刊

寶益自斂避彬彬文質久而蓋彌章焉夫不急於外者宜有裕於後大江以西
士風炳如於是乎則故予首書其慨然者以厲吾黨知正叔爲可徵四明袁桷
記

采芝亭記

太行首於三危伏於河折北而尊爲恆山支巒複岡畢赴於燕秩秩然復纒屬
以東數十百里入於海上土人以其西來號曰西山或曰駿極于是山急而堅
凝地多空寒不可以兆域又曰是爲都城之衝自北而南太和薰然捨是奚所
適於是工部尙書郝公景文惕然維思實震且陰迺相其大瑩先君子之藏祔
陔而善崩始遷而謀焉大德甲辰得卜於某山卜者曰是山之形翼容而味鳴
日中而升戴坎以寧以華以承及旣葬明年守冢以芝告公弗信展于墓下登
坡而望則數者萸者煜然于山效獻以萬歸以示其客袁桷噫是果爲芝邪今
舉世之言瑞者必首於芝芝不常有於世故窮夸闡珍得一二焉輒指以自瑞
使誠瑞邪寸畛尺壘其融液變化不若是之固而甚者竭四海之類夫芝者聚

焉以觀不亦陋乎夫土和則芝生始公之心懼親之不寧故擇其溫密以永其
幽菌蠹而擢靈土之和也盈數爲萬非昔之固也不侈以求異德之負也維山
之陽彌鞏彌剛子孫之祥也孝感而文著於瑞乎何有

梅亭記

廣信據江浙閩越之衝萬山交牙四顧羅劍戟其氣蜿蜒磅礴爲丹碧玉石長
溪貫其中凝膏溢藍愈積愈完山水之秀甲諸郡故其俗多刻厲自奮矜謹節
義言文學道德者爲儒宗治政事者爲吏師建炎初中原縉紳家多居是州其
舊聞遺語尊守傳信歷歷可數皆數百年文獻源委非如野人簍子掇拾目近
爲利祿地方是時人物之勝足以甲山水而浮屠老氏之跡實不與焉弋陽爲
縣山益深水益清車輪馬足之聲不入于其境寒泉蒼巖百里一色山之陽有
陳隱君居焉隱君守儒以自信閉門授書朝夕盥饋合其孫曾嬪婦男女將百
人年九十四以終有子曰德父教授帶湖十年法當得致仕官以鄉博士歸于
家迺築室旁近之華山爲雲居雲居之西爲梅亭曰香月於是其子敏學志仲

官京師俾予記之且言曰自吾大父恂恂之於是居也詩書以持稼穡以時門無忿色而少長以敘吾不知其化之及於里也自吾父觀之今七十餘矣誦聲滿戶而樽俎在牖氣完而色康其行舒舒其語徐徐視吾祖之孫曾亦相邇也噫榮何以過是袁桷曰天地之理嗇者豐之始周流于六虛其暗也實明其闢也實闢昔之澹然而無營者德之基也養之于其身而施之于其後充以引之吾知其孝謹於家者日益廣爵祿於朝者日益侈視斯亭之手植豐融婆娑連理而並實陰陽之生物其不出於是明矣詩曰高山仰止景行行止亦因以勉夫志仲焉

西泉記

高君舜臣通敏才智之士也治其齋心之居表其顏曰西泉爲予言曰太行之山合于恆山隱伏聯亘北東以入于海肅慎朝鮮屹然表于其地者皆支絡也泉生於西歸於東陰陽之常性也周人有言曰肅慎燕亳吾北土也昔之疆理吾於是乎考則凡北紀之山水繇西徂東所繇來審矣爲我記之舜臣於金爲

大姓官簿歷歷可紀居京師數世邇其泉源知其晝夜之不止必達于其里禮
不忘其本其高君之謂與予官京師踰十餘年望所謂西山者蒼拔翠峭實太
行之苗裔水流無窮演迤洋溢導之爲漕渠止之爲陂塘資國用以爲民食者
泉之利也其次達官貴人因之以丘壘濬其冽清挹其回環蔭藉蕃庶將利其
子孫以求全乎茲山之下不知其幾至於淡泊空曠之士則又抉尋幽深滄膏
匯甘使夫絕塵稅駕者止焉以嗟噉焉以留無有窮已噫西泉之效誠博矣哉
在易之象曰山下出泉蒙其險釋矣謹其所之君子之用也高君致用以推本
厥旨明矣究反復之道益驗於身將見其百折而不撓獨行而不懼非茲泉也
與念其祖德繫命名之意與其兄堯臣閉門窮經沈思篤行予得與之交將並
游夫西山感夫昔之廢興不在於險則泉之東其寧有已邪

懸庵記

慈溪黃彥實少喜豪士漫游故都見世所稱知名人率脂韋自保祕惋恨無可
與語酒酣氣雄謂海寓方晏安休明宜取天下事置念慮以入計畫否則搜抉

險幽浩然爲萬里游遇不遇命也未幾沂采石上漢江西游荆襄歷觀用武關
要荒榛廢壘猶有能言昔時得失益慷慨自振而所見公卿大夫與夫布衣之
士則皆與昔交游者無大異於是治其居曰鱣庵以自傲求記於予亟請焉昔
之養生者志專而若愚遺世絕俗懼其名之至也介然以逃泊然以邀聖人憂
之慮其器之不弘不足以任斯道也然舉世之士樂同而惡異曲者常安直者
易危則寧直焉者斯近矣彥實智通於事物行幾於古人視今世之鱣者吾能
言之草野游京師決臆裂皆不顧生死詣廟堂求奇中書未出袖而利祿萌於
中非鱣也鄉里稱任俠大言斷是否陰持短長以利己非鱣也佯不潔清詆罵
排觸而私有揣摩問之而若樸卽之而彌汗若是者又其似而靡者也彥實先
大夫文節先生爲史館官咸淳上殿論浮屠不宜入禁掖度宗大怒手詔出國
門未幾貳守桐江與宰相兄子爭事卒易他郡鱣無以易此矣古之君子事至
而名隨人棄我取自謙之道也聞彥實居山中閉門讀書益不妄交求古聖賢
摧折困踣之本發而不可犯者養之至也予歸里聆其言斯知之矣延祐五年

夏四月越袁桷記

桂山堂記

江南地宜桂故凡廣居室者必植之以爲美觀焉釋木者曰桂白華叢生冬夏常青人取以自近良有以也地記言八公從淮南王後入山爲仙作叢桂詞與漢史所記異予獨愛其簡潔幽古爲文章宗師申言攀援非自息於林莽者讀其辭可悲也矣上饒周君

居龍虎山因其地之隆植桂于上築堂面之而名曰桂山徵記於予予曰今龍虎山爲道家統宗金碧晃曜出于縣官搜奇抉幽異夫昔時之荒煙古木軫相結而袂相接也周君主畫諾以極其榮觀則今之所命名者若不相似何也然予嘗聞古之至人其顛恂恂其言諄諄執中以權損益其未備黜紛華以從事于寂寞者非有所激也周君智周於身謙抑自持思夫山林之靜養其沖泊先事以自警古之所謂備豫而能立者近之矣周氏之先得道於希夷陳先生當熙寧時猶亡恙見其曾玄離世樂善樹德之訓有自來矣且夫託物以喻志詩人之心也仰觀於山徐視吾手植者風雨冰雪

貫四時而不改擬諸形容得無似之乎異日將游山中詠八公之辭反招寫心僕援筆未敢以老爲辭也

張尙書救荒後記

儒學提舉天台柯謙自牧爲序一通言今工部尙書張公之佐江浙也活飢民視貪帥爲去思帥能歌詩者追美之是可謂無負張公矣往歲楠以翰苑屬歸里里人言元帥府始治婺女有總戎官鎮慶元言慶元聯蠻國入海最近稍失控御兵費不可測乘驛入都白利害時太傅丞相坐省中盛言總戎非兼元帥不足以重鎮太傅察其言有私便後雖移鎮而卒用常調官如舊制焉大德十一年歲大饑浙東副帥

命屬吏疾傳詣行省告變曰慶元接海口僅數十

里羣盜據島嶼出沒將入城剽劫願速分行省軍往翦其窟穴緩則不可治行省大驚將如議張公時爲郎中丞相謂公曰計安出公以調兵非所預丞相固問則曰果有變帥府當印署白省副帥獨遣非完議也召屬吏問變奚自府有鎮守官今上變爲何地屬吏頰首不能對遂移檄問盜今安在帥府得檄大驚

咸言無是事繇是卒不發兵而慶元迄無宅噫方副帥造謀時當饑侵窮困之急稍加以兵山海通竄寧能斂手以快鋒鏑一有抗拒誣以叛逆則凡故家大姓蔓延於囹圄之下將不可勝計人能知救荒之爲美績而不知吾里之人微張公之言有不待賑恤而皆置於死地矣敢書以補郡乘俾知夫立帥府本末蓋如是張公名 字士瞻衛郡人處事明遠知大體若是事寧勿爲記其可乎

晚香堂記

延陵吳成季父奉萬年之祝于崇真大德甲辰二月承詔爲祠官于衡山復命歸祠其受道之山曰龍虎龍虎於番爲接壤番於成季爲鄉井於是其嚴君偕七十矣迺避館屏驪卻入里閭舉觴再拜以祝以壽宗黨姻友旁列敘坐勸酬以禮進退維度聚而言曰嘻其盛哉成季曰不然繫昔遠祖挈國以讓晚交兵間旣壽且康至于番君墜緒以興維用之嗇報必以厚自吾少時聞爲是州一不承意則交喙爭誚而吾父子吟詠佔畢吶吶謙讓不能出諸口至論成敗衰盛嘗掩卷三歎以自警厲而今也二老人康強起居佐理內外冠帶童丱咸立

左右其迨乎遠祖之意願築堂以奉而名曰晚香其何如衆曰唯唯未幾來京師屢屬予以記予以謂大夫士之養莫侈於羊犬豕而世之希年遠引者至以金石草木爲可久菊水之壽效極於胡廣昔之議廣猶若糞土則名與年較不相並今成季榮於其身顯於其親惓惓然企本支之感吾見吳氏子孫孝謹遜千里門秀敏有列于朝而耆耄老人方遊遨嬉戲擊鮮養醲若古之所謂偕老而終隱者其不在茲也傳記言王公大人晚歲託言神仙多以遠禍成季游乎方外之畛憂世嫉邪嘗不自置異時承渥流問則司馬子微之對殆猶糠粃而名以晚香者非獨爲吳氏美是特有待於成季也四明袁桷記

玉冠記

大德乙巳歲二月甲申皇帝受釐于玉德迺命尙服出玉冠以賜玄教真人張公其製爲山形空其梁述温栗精潤隆殺悉等莫有究其攸始袁桷見之曰此紹興宴居所服韜髮冠也舊聞長老言思陵爲清暑樓聚金石奇刻飛湍清樾森鬱蕭爽伏日退朝衣白縠羽衣冠小玉冠閱定書蹟其殆是與維古弁冕雜

飾以玉至晉宋間君臣上下崇習玄理清逸修簡始為玉冠今世所傳元帝像及晉賢圖軸與此無毫髮異則紹興所冠猶古帝王遺物按道家書言神君始建飛天玉冠其製與遠游爵弁微近疑有差等含玄秉陽舒精吐光繫冠維則欽承是天寵進道之篤其不在茲乎夫王者陽中之陰也首者體形之上神精明之主也陽非陰不能以成合而凝之出入于斯易之門也方今張公以清淨理贊益熙洽縝密而不露孚尹而不泄遠而望之誠理勝矣庸述其始以示于後袁楠謹記

孝思亭記

三山吳明之築亭於陽岡大父之墓側名之曰孝思按昔之言禮者則曰魂歸于所居將致其一焉墓有祭有亭為非古矣善乎延陵季子之言曰魂氣無不之也夫專于祠宇不意若是拘也物精神著其氣發揚者出于丘壟是則必首於墓將奚以疑古之聖人懼其瀆且數也嚴為之防速貧速朽夫豈非夫子之語祭墓為尸是墓有祭矣祭而不屋失祭之禮矣絲宋宰輔修其墓田不復拘

甲令層樓巍閣空青金碧巋然于坡陁之阜過者必式其防遏森翊誠以爲千
百年無慮也乾坤合運頽垣廢址上牛羊而履荆棘欲求子孫不可得而明之
方慎其繚圍構亭以綏其體魄是則過於盛者必有衰吳君之志追遠以求旨
微意深鬱勃之興將自茲始大舜五十而慕昔以爲難能也邈而推之探其微
旨亦難能也禮抱孫不抱子祔于王父幽明之通瞭然而莫遺明之審之而克
行之楠也故國之公孫其思于祖父也罔敢替因繹其旨爲之記

福源精舍記

建炎初秉義李君以勇略捍衛鄉社倜儻急義植德流衍諸孫以詩學接武科
目恂恂退讓望知爲秉義家子弟衣冠浸微獨溧水府君之子登仕君寄隱塵
市厖眉幅巾治生產益有理年逾七十迺卒予請告歸里其子印傳以事狀踵
門求記其精舍俾永遠嘉熙間溧水君卒于縣治登仕甫八歲祖母朱氏奉其
喪以歸將葬于上元之祖塋朱母泫然曰孤兒奚依少不利必隳其先祀相于
慈溪東嶺楊奧之山下告以吉結爲四塋昭穆以敘而以其殤女祔于旁近登

仕長有室曰茹氏朱母卽世旣葬茹氏曰吾姑以橐中裝成是山夫君獲有成
立新婦不淑紹先繼志弗展擴則奚以緝前人光亦斥奩資廣山壘建祠屋精
舍以奉其舅姑茹氏沒于至元之十九年登仕君沒于至大之四年大德六年
印傳與其妻胡氏同入山拜墓顧瞻周迴蕪圯日廣胡氏曰再世尊章有成妾
獨不能少效萬一聞佛氏有大報恩而用其法名爲福源精舍命僧以居遂一
以浮屠所需者咸備具復買田若干命僧某首主俾其弟子相次以繼其所度
僧非李氏不得入予愕而有言曰吾里鄉相什百各以功德院爲請有以其田
園與子孫共分析求利益穹樓轟塔坡阜松柏蔽翳綿數十里時運更易各降
在皂隸孤童負囊偃偃不能以入每恨其祖父作是爲無益也予嘗過其祠宇
薪草雜糅破爐凝煤而主茲所者儻然有曰彼昔承寵恩故幸若是其子孫何
能預至于士夫之家庵廬相接幸其不爲有司之所隸羣聚毀撤甚者發其丘
壟噫可勝道哉予謂三孝婦之志人莫能並心純而孝專發於自然非過信以
溺于異端思其創始思其悠久是則秉義之澤良未艾也爲浮屠者聞予之說

寧不有泚其顙印傳復爲穴三一以葬生母張氏其二則夫婦因以預備云

治平寺記

治平寺主者以建寺本末謁予爲記其狀曰寺在城南門外渡江曰銅盭浦鄉曰鄭塘平疇鬱密松竹環植望之竦然其間者卽治平也寺建於後唐清泰僧曰道隆以法華勸民習誦持善果剏是地三十畝有奇始居之復得別業爲畝六十其初曰東李浦院錢忠懿王俶給符牒俾永遠又改爲保豐院宋英宗更元治平祀明堂始易今名法智大師以教乘闡東南習學皆其徒故號爲天台宗元豐間有性法師講法華別立機要從者雲集而田租漸廣居民染疴下疾師呪水飲之飲者日益衆師呪於池悉愈寺舊有東西池今呪水池猶甘冽可鑑師號山堂卒葬於是寺嘉熙三年寺燬于時上師實主是寺遂新三門法堂廊廡等若干迺謝去淳祐六年堯師始成殿宇居室所宜有者悉備咸淳八年子直良法師至曰吾不可不私淑後學戶屢日接簡約暢隱法華之說大備而治平名益著率由是陞于南湖者凡數人南湖四明之祖庭也復曰一蓀守是

山今十有五年繫前脩是承昔之營構皆腐折傾漏不可支今幸完復巖備惟
創建昔人缺軼靡有紀願登其事于石楠以爲今之爲牧守者苟度歲月堤防
津梁田野之不治尙何能望究其本始爲世胄者日躋其先祖父名諱近在數
十年間有不能答未有如浮圖氏沂源推根若是之詳者道散於九流百家各
自奮植吾儒之教末俗以空言爲高卒不能勝甚者去其舊籍郡縣養士之田
皆漫漶不可考如蔡師所爲豈不有愧庸因其狀以紀亦以勵吾徒之爲師長
者云

海會庵記

出城西門皆良田白水高下綠樹雞犬相聞蒼然農家善於其業者也予繇京
師回艤舟驛亭望之則朱甍碧瓦傑然爲人天居佛之道以枯槁堅忍爲能事
卉衣糲食樹下塚間不求其豐足故從者樂然如歸二千餘年爲之說者以莊
嚴爲善果愚者益信狂者益怖而梵宮寶刹合郡縣山水之勝悉爲所據日增
月益有不可勝言者四明海之東絕處爲補陀巖大士顯焉鄞之東爲育王山

釋迦舍利塔焉遵南爲岳林爲天台皆游歷之所而補陀育王自天子至於王公百司乘驛奉香幣不絕於道四方之民終歲膜拜至於西門始求其渡海之路然而觸風濤煙霧率莫悉處所又舟人伺其危殆時有不利目接其事而來者益不止豈非其教足以傾動而爲善者有以復其良心也有僧曰妙壽以其建庵之始末告曰茲庵之剏專以奉補陀育王岳林天台之游者也初卜地於城西郡民任氏首不過地千步屋三楹有同志僧妙然日習宗尙善勸募傾捨駢集又有僧元安清持以行業振勵信者俱至善士翁文堅翼輔之首建佛宮且割田以濟未幾宣慰楊侯梓益買田以贊相由是拓地爲畝十五屋百楹殿堂門廡迎賓習靜各有其地泛海有舟放生有池獨不設方丈懼後人之佚樂以自恣也不請寺額曰海會庵懼其奪攘以爲茲所之凌替也其狀若是願請記以求永久予曰博施濟衆昔之聖人猶以爲慊浮屠氏日丐假於外而皆足以慰其志意蓋其說汪洋浩博參之以報應而爲惡者懼吾儒之說百姓日用而不知卒之以道政齊刑者不得已之具也逃空虛絕人事釋氏本旨而其生

產作業皆取於吾教若今有司興繕則民不勝怨咨海會之成相胥以勸何其易也妙壽深湛善思事爲之防曲爲之制其惓惓于後者厥慮若是雖欲勿永久其得勿永久乎

重建延福院記

予絲集賢還里居有僧永華躡屨重趼踰數千里南康來介天平恩大師求記延福院興造者其狀曰院在南康建昌州西山曰龍城唐馬大師嘗憩寂焉殿有記宋雍熙間廣陵沙門處暹所撰歲久蕪圯宋末郡始署開陽院僧紹志主之墾殖磨刮集材庀工鍾閣齋室凡僧之所居處者咸屹然以成至大德庚子主茲山三十餘年矣命其徒曰吾宜藏密以興造事付汝等咸頓首曰曷敢不承繼曰繼福迺襲院事首建三門及外門曰繼祖繼壽永翌廣賓至之所視昔居處之宜益廓且完繼祐迺曰吾新殿視瞻廣博謂色身小大擬於形容良非吾道然徧滿充塞當有是事揆諸空幻則俱非實相宜改而正諸遂易舊象得舍利五色於佛胸背間宋咸平僧道志所建或曰是若有脗合然者歟於是梵

頃贊頌而若子若孫皆勇猛赴事謁於事佛之徒增飾金紺象設尊重瓶鉢精
潔烜然如人天居復增其田若干紹志終于大德七年壽七十五葬寺東之陽
今守其遺言祖子孫相繼如初孫七人曰永岫永豈永斲永華宗槐宗權
讀狀畢迺問華曰志師能植立若是宜有本始華拱手曰昔圓悟大師得法第
子曰真牧大師賢賢度其徒幾千人志其派緒也予嘗聞釋氏服勤壞形實本
持攝至於廣居榮觀將以懼伏庸駭除其侈心非專以是爲能事生而不居死
而不餘故其道益固傳有言曰又何加焉曰教之能仁之教書遍中國爲禪學
者不立文字而其徒復守師說文字益繁今而曰教之於二者將焉取乎哉他
年曳杖游匡廬西游龍城問聰明道理其必有以告我則予之記興建亦得以
永久也

資教寺修三門記

吾里法智大師以至行約言闡揚天台大行于浙東西謂城南延慶爲祖庭故
四明旁邑近郊雖丈室尋地多博辯秀出之徒過於他郡西山資教其一也西

山在郡西四十里周顯德元年號廣德院宋治平改曰資教負山面湖有菱荷
鳧鷖舟楫亭橋之勝凡郡人之游于湖者必至是寺湖湮爲田游者不復至而
寺漸頽圯紹定中月公首授徒是山後謝事上竺願復領之世言上竺第一院
西山號最卑繇月公再居而寺益重故講說者爭趨之延祐年道師逢原以
郡選主之其徒亦曰彼學專靜選不可易也予舟過先墓必望所謂資教者焉
空巖傾欹樹木翦落將不堪其居比還里則昔之頽然以興重簷翬飛表表出
林杪道師曰吾首新三門餘以次繕治不田以食廢其教將有愧集徒講肄則
庶幾希前人光三門紀修願以囑焉考諸禮經制有五門雉門居中故曰三門
秦漢損益不遵於周連門爲三唯王宮得用官署降殺非雉門之制久矣釋老
宮室擬於乘輿雖儀制有令不得禁天台以明靜爲宗弊衣惡食脫氛垢厭榮
觀汲汲以土木爲急崇信興敬將於是乎取夫像設之教首于西方其能傾動
禍福必召募焉以集事師謝不肯寺久廢得人焉以興則吾徒之爲校官者竊
食自嬉安得無愧焉

吉祥寺重建記

主吉祥寺崇柏師以其興造本末爲狀一通俾予爲記其狀曰初寺在翁洲南香柏巖唐有僧慧超相攸築居峻絜厲行居民傾信寺遂以成漢乾祐中賜額曰崇福至宋咸平有真大師善持呪能愈閭巷疾病號真大悲崇奉益廣邑中尉曰丁漸以柏巖峻絕困登陟易於廣平環以九峯繚以清溪審勢辨方各當其職宋治平始賜今額曰吉祥紹興中給事中黃龜年以讜論忤時宰避禍絕人事僑居絕島獨與方外交每至寺中時有宏智覺禪師主天童宣密挾妙師表藜林其大弟子輝主是山傾動島嶼黃公敬之施所藏辟支佛牙爲閣以度而寺益增重遂爲海上寺居甲乙人稱之爲小天童繇輝師始也皇慶二年火一師始作法堂會遷宅所不果終至是柏居之首建大殿三門次以藏室僧堂凡僧居之所宜營繕者畢具泰定三年告成俗姓虞氏其父酉發嘗爲海運官有兄曰庭桂曰庭芝慨然曰吾不可不相吾弟三世佛像吾與弟共成之今夫浮屠氏宮室率爲禍福說以誘民陰奪其財民日以耗有國者憂之若師所成

就不丐假於外竭其贏餘以復舊觀怡愉相資將瘁躬以究築凌陰廣腴田以爲後人補緝費志專念遠是果能與其教者也余誌釋氏建置每有感於學校若是則又重有所感也師居淨慈嗣法於慧禪師屏外持攝慧之學益有光矣勉之哉

妙果寺記

廬山東林寺以遠法師爲祖庭其教行乎海寓閱年滋多龐幻雜糅壞宮夷址將絕其遺教寺僧普度慨然興復率弟子十人芒屨草服詣京師上書演爲萬言又集歷代經社緣起作蓮宗寶鑑十卷仁宗在東宮閱其書盡初帙問曰得無欲布施乎合指謝不敢又問曰得無欲補僧職乎復謝無是想惟蓮教墜絕願殿下振復時武宗皇帝在御近臣以其事奏卽以詔旨慰撫如律令至大四年始播告中外而度俾職其教爲優曇主師丹陽人在縣爲竹林山妙果寺率徒喻俗將大廣其居以稱聖天子崇重之意予嘗謂象無形儀域無遠邇遠公之言曰思專想寂三昧之本彼所謂邦國之殊異相好之莊嚴蓋將絕其邪惑

一淡泊而無所逢大雄氏設喻警蒙攝持示境境由心發境滅返真清淨安樂
包括宇宙是知道者又安有四履之分別哉度師博習教乘示於衆者類焉以
導其師曰禪師久居東林後主天童嘗率善士修遠公法來於江西者踵不絕
度師與其教是果能有傳也記寺興造摭其綱要以明初志云

石夫人廟記

州東北隅有山昂然以尊秀特瑰異望之若貞女獨立凜乎莫能犯水旱祈祭
輒應土人因其形似而名之曰夫人山唐咸通八年主簿李成矩記其廟貞固
之封見於祠部嘉定十七年加昭德順應咸淳六年加福祐皇元合一郡縣大
脩祀典茲山必預焉泰定三年州判官張思訥承命致祭肅瞻廟庭棟壓瓴圮
心駭目瞪折旋冥思喟然有言其何以稱上命遂謀於州尹曰蘇君同知焦
君彝州判官塔海復語其僚俎毅許裡割資以佐工役而凡隸於祠下者胥勸
相事是歲廟成乞記於楮原夫宓妃靜波神女行雲此騷人墨客之寄興也二
孤望夫至今游覽者羞言之若夫天姥雲母穹窿磊落淫言鄙語不能以入是

則茲山之靈功在水旱餘奚以議傳曰山澤通氣記禮者曰地秉陰竅于山川炳靈赫奕民社是依崧高之詩實有考焉遂作迎享送神詞詞曰

磅礴兮上征渰兮積兮縞繒膠木轟兮翠旌恍綏顧兮揚靈抱貞固兮合窈冥

奇功教兮集鏤騰隨兮稜稜駿兮烝烝帝祀兮永承其一來兮弗趾去兮莫視

有穰兮億祲祓不祥兮盪癘密石兮牲繫俛精思兮帝制百神擁兮森衛苾芬

歆兮歲歲其二

信州自鳴山加封記

至元十四年玄教大宗師張留孫扈從世祖皇帝于兩京言信州自鳴山神有

靈狀敢詣闕下敕禮官崇顯之是歲皇帝命侍臣李衆劉子中降香寶銀奩旂

以金錦顯其神三十一年成宗皇帝有詔遣使致祭嶽瀆在昔登載者如式崇

奉大德三年三十八代天師張平錢塘潮言神以雲雨昭著自鳴山事見

郡乘宋元符始有廟號繇宣和迄咸淳制書凡十五下乞如今皇帝詔令於是

符于州考證無異辭至大三年玄教嗣師崇文弘道真人吳全節乃言曰吾徒

食茲山有年矣闔闢摩盪繫陰陽是資變以行神神絲以興今天子裡奉祠祭
吾教益昌自鳴於龍虎封畛相入捨是其何言遂復請于朝得加封爲明仁廣
孝翊化真君楠待罪翰林十有五年矣嗣師曰龍虎紀述吾不以累子茲山胛
蠻紹定之際先正肅公嘗紀之矣子誠不得辭楠嘗聞之地秉陰山川竅焉通
而後能鳴石之徵也聲生於空因山以著昧其初而以爲神者其諸異乎石之
鳴也風霆流形神始出焉神非妄也茲道之妙老氏深知之矣予何敢語延祐
三年四月會稽袁楠記

隱仙記

宋開慶初伯父賓州我先考郡公將除大父尙書公喪相與議曰崇親報本唯
躬行是先焘蒿悽愴鬱然而莫能見者將導達之則屈伸之義足以考聞諸老
氏有黃籙齋善攝度彼果能濟則吾父將超然于物表非崇泥以求福也齋旣
成以尙書公所遺祠部牒度道士三人王君德華在是選二人皆亡化不復紀
獨王君服道士服幾七十年往來袁氏門且五世貴燄侈感嘗親見之至枯泊

額齋則過門風雨不少阻且曰吾寧負袁門哉其於宜所學者曰章奏符籙兩
賜疾疫親究而遠扣方外士來質衣以請百誑不倦以其勤且無悔故有所成
就今年八十有八而請者益勤迺語予曰今卜藏于城西隅名之曰隱仙仙也
者返真之義也魂升魄歸死生之大義也而釋仙者謂爲不死古果有是若吾
徒者寧能企是哉桷今年六十有一矣考其入道先於吾生死者若蜉蝣生者
若稊稗推一門之盛衰足以驗一郡之興廢而桷也以謙薄之技獲官清朝今
仕焉而止願與王君考游歷之舊指其歸藏則曰委順觀化寧有恆於心懼後
人不能以紹志俾預書平昔之出 且以勵于後今主焚修于玄妙聰明不衰
壽益未艾家世定海縣自號曰蓬山志不忘初也泰定三年四月甲午見一居
士袁桷記

通玄觀買道士記

通玄觀道士賈志福年八十三化于其居有徒曰王道深者言曰吾師以不言
爲宗其學澄寂寡約不爲翕翕詭幻褚衣草屨寒暑自得有問其道者不以對

機藏箒啓指喻微密若口授而耳屬也始爲汝南民弱冠得法於棲雲王真人
王曰知者不言子游四方能果不言以自全乎後游南陽遇軍帥脅以語不對
復辱以箠榎師正色畫地作無語二字軍帥竦愧謝以白金將築室奉之會得
間走京兆復遇其師曰汝志已完忍辱易忍寵難其居京師以觀子之有成於
是迄歸於京師會有數薦于先朝者復卽遁去然居通玄而號清靜散人實洞
明祁公之所強也又曰師少時嘗得奇疾夢一老人授以七桃食之寤而愈其
徵家爲道士者凡七人有弟曰德常亦守其學今居大名之嶽祠韜靜完絜與
吾師無異願有述以廣其道迺爲之詞曰

繫摩兜韃厥機孔艱維柱下學知者不言納息于踵養神于淵匪曰不言其道
已完道豈文傳文寶累智虛辭借浮一跌千里竊陰據陽詭立名字夸者逐魂
固者死技睽此嗒然奧密是造不懈其躬不喪其寶心焉死灰頭若蓬葆藏明
委順是曰至道翩翩二難孰去孰存厥徒允從匪私其温恍焉松聲彼聽莫聞
勵爾後人永矢勿諼

珍佛宋版印

清容居士集卷第二十



一 二 三 四 五 六 七 八 九 十 十一 十二 十三 十四 十五 十六 十七 十八 十九 二十 二十一 二十二 二十三 二十四 二十五 二十六 二十七 二十八 二十九 三十 三十一 三十二 三十三 三十四 三十五 三十六 三十七 三十八 三十九 四十 四十一 四十二 四十三 四十四 四十五 四十六 四十七 四十八 四十九 五十 五十一 五十二 五十三 五十四 五十五 五十六 五十七 五十八 五十九 六十 六十一 六十二 六十三 六十四 六十五 六十六 六十七 六十八 六十九 七十 七十一 七十二 七十三 七十四 七十五 七十六 七十七 七十八 七十九 八十 八十一 八十二 八十三 八十四 八十五 八十六 八十七 八十八 八十九 九十 九十一 九十二 九十三 九十四 九十五 九十六 九十七 九十八 九十九 一百

清容居士集卷第二十一

元六袁桷三誤

序

易三圖序

上饒謝先生遜於建安番陽吳生蟾往受易焉後出其圖曰建安之學爲彭翁彭翁之傳爲武夷君而莫知所授或曰託以隱祕故謂之武夷君焉復曰吾易神也易何爲而神也神者易之始也易不可以強名也不名則亡易願敘其旨袁桷曰夫亡易者非聖人之本旨也神以合聖人之易斯得矣然則易爲神無端而莫可見也惟無端焉故無體焉存而明之而數以生焉數生矣而始有變變立矣而會以理理者其一也理不能以盡易因數以立者理也用變以逆者非理也故曰陰陽不測之謂神始晁以道紀傳易統緒截立疆理俾後無以僞至荊州袁溉道絜始受於薛翁而易復傳袁迺以授永嘉薛季宣士龍始薛授袁時嘗言洛遺學多在蜀漢間故士大夫聞是說者爭陰購之後有二張曰行

成精象數曰續通於玄最後朱文公屬其友蔡季通如荊州復入峽始得其三圖焉或言洛書之傳文公不得而見今蔡氏所傳書訖不著圖藏其孫抗祕不復出臨邛魏了翁氏嘗疑之欲經緯而卒不可得季通家武夷今彭翁所圖疑出蔡氏惜彭不具本始謝先生名字今不著其終也世能道之

易集傳序

觀象畫卦庖犧之本旨也因言意而廣象焉三聖人之本旨也王弼後出附小象以言理儒先莫能病若繫辭傳說卦等篇弼莫能措辭審是則弼幾一偏矣十翼之作有象焉有象焉專於理而作象象傳焉者夫子之志也然則文王周公之象象其悉皆理與曰非也卦本於象八卦首之定名以爲象則井鼎小過是也言意以爲象伏羲言而人不能知之文王周公始申言之文王之言見於象周公之言見於爻是則不俟予言也易有聖人之道四象象傳果唯言意焉則變占乎何取曰有變焉有占焉伏羲畫不變於九六則變見之占則文王於象附言之象未始分文王始離之變之疾者莫先於蠱憂世之深也若分象則

師晉小畜之類是也爻變於占因筮以見者也其卽見者漸小畜訟之類是也象爻合四者而言之夫子不一言之何與曰傷哉夫子之志也事莫尙乎辭辭非理不能以定人事吉凶絲妄而咎以與先之以變占是易殆卜筮之書矣器絲動成動斯靜矣取靜觀動將於是乎則斯其爲象也大矣夫子於說卦焉始彙之彙以窮其變占則變占者筮之始也故其首章先於著二章次於卦先天之說七言之懼溺於占也後天之說一言之人事之本也而終之以象焉維昔康節邵先生作方圓環中圖合於天人皆本說卦充類以至知夫聰明特達之士不在於諄告也若繫辭傳設卦之方窮神之妙其詳於爻者毫釐不能以易積數以成變易以動肇於方寸散於六合幽眇廣大取而莫窮應而若遺因卦以測善算喻者不能窮也舉世舍是矛盾互持雖百世莫能以解吾故曰非繫辭傳不能以知易是說也邵子之說非僕之說也楠不佞讀易二十年歲月逾邁所見益懼紇石烈君希元篤志嗜古於易精思以求搜摭疑義私嘗歎然莫能以對卒能先予以成書不鑿以求通不拘以強附會其粹精足以垂世故以

予昔之所告冠於篇首俾知夫同焉以異者將以革夫株守偏弊之失則予之所著其果有同乎其無同乎

新安程子見四書圖訓序

象數可以圖言名意不得以圖言以圖言之其亦有所本乎昔者聖人觀象著圖因圖爲書範圍發揮由書而始通則夫圖之祕非書不能以盡是書之明於圖者也後聖繼述遵文演圖器度物象之微剛柔善惡之應若天旋之默運于樞紐其不可以繪畫得之者猶因名以立義此圖之輔於書而不可廢焉者也二者之用各有先後合而言之者吾不知其說也自正心誠意之說興茫無畔岸朱子憂之遂以其可據依者爲之主而體用知行之說實切於學者之功用後百餘年五經廢棄遂復勦取其近似端坐塗飾而根柢源委悉不復攷禮主於敬理主於善一言以蔽講學之法糜爛而不可救矣新安程子見取論孟中庸大學之書切於吾身者析而爲圖以輔翼朱子之教抑亦使夫人知爲學之敘非字義之可盡條分目舉必有能篤行而親識之者斯足以盡夫斯道之要

其勤且備可謂能矣昔真文忠公作讀書記仁義性命之說各以類從先正肅公作書止之曰使若書成學者將得以自肆今是書具在視今之言理者與古賢無異論其所學則又甚於朱子之憂矣子見之圖其必有以拯諸

輔漢卿先生語孟註序

解經莫嚴於聖賢見於語孟其語簡其旨明子思之釋經尤得聖人之微旨今其書具在也自漢傳註之學興蔓辭衍說浸淫乎萬言魏晉一切掃削明理之說歸乎空玄二者之弊遂淪於偏滯學者昧昧無所依憑焉踰千有餘載矣至宋春陵碩儒開伊洛之緒正說至道粲於簡冊良謂大備後朱文公出懼其剽竊之近似也源同而派別之統宗據要蓋將使夫學者不躐等而進若律之有均衡之有權不得以鎔銖差也既又懼其疑之未釋復爲問答以曲喻之其詳且盡不復可以有加矣書大行於天下而後之師慕者類天台釋氏之教文旁行側注挈綱立目茫乎皓首不足以窺其藩籬卒至於聖人之經旨莫之有解日從事于口耳孩提之童齊襟拱手相與言道德性命者皆是也摘幼承父師

獨取黃輔二先生之書而讀之黃公之書嘗輔翼其未備若可疑者則以昔之所聞於先師而申明之至於輔公則直彰其義衍者隱之幽者暢之文理炳著不別爲標的以盡夫事師之道微文小義簡焉以釋經爲急而其知行體用之說不蘄合而有合矣二公所爲是誠有益於後世而今世補文公之遺書夸多務博雜然前陳莫知揀擇余獨病之合黃輔以傳則文公授受之旨益得以遠輔公書其子季章舊刻於武岡兵禍散軼今其從孫政與其子華亭丞友仁相與謀曰遺書不傳吾輔氏子孫責曷敢緩遂刻先生之書于家塾俾序其事予獨連言於黃公者將使夫後人知二公爲文公親授黃公之澤已斬輔氏爲未墜是可哀也已是可嘉也已願勉哉正學之興其必在是也

郭好德論語義序

唐儒作五經正義疏必先之以衍義而始明其傳註其先之者何懼汨於經也釋之以義疏焉者有訓詁焉有制度焉至於名物象器疆理飛走潛動之辨不博不足以盡約之以衍義非背於傳經之說也理唯約足以見漢稽古三萬言

後世嗤之至朱文公承濂洛之正傳始爲語孟精義久之慊然曰宜尊所聞今所傳集註具訓中外下逮荒陬絕島家有而人誦文奧義古至於不揣者斷章譏駁識者哂之京兆郭君好德秉彝父授徒于其鄉塾懼世之不達於辭者習譏駁之病撮其精微合於簡易將使夫初學者若遁塗以進遇險以休使少窒焉必由是而達在易之蹇曰險而能止知矣哉蹇斯通矣抑嘗聞文公之教於其家也謂集義之作義理詳而訓詁略別爲一書曰訓蒙口義今此書不存秉彝是書殆深得文公之意近世東南諸儒旁行側注鄰於釋教之學濫觴而不可禁予得讀是書深有合夫訓蒙之說孔賈遺旨能以遠紹其不在茲書也歟

龔氏四書朱陸會同序

五經專門之說不一既定於石渠鴻都嗣後學者靡知有異同矣易學以辭象變占爲主得失可稽也王輔嗣出一切理喻漢學幾於絕熄宋邵子朱子震始申言之後八百餘年而始興者也春秋家劉歆尊左氏杜預說行公穀廢不講啖趙出聖人之旨微見劉敞氏葉夢得氏呂大圭氏其最有功者也尊王褒貶

則幾於贅是千餘年而始著者也書別於今文古文晉世相傳馴致後宋時則有若吳棫氏趙汝談氏陳振孫氏疑焉有考過千百年而能獨明者也詩本於大小敘諸家詩已廢毛公說尊獨蘇轍氏始刪鄭樵氏悉去之朱子祖之此又幾二千年而置議焉者三禮守鄭玄氏正義皆旁正曲附唐趙匡氏始知其非宋諸儒駁鄭幾不能以立甚者疑周官非聖人書卓識獨見雖逾千百世亘萬古而不泯是則寧能以一時定論爲是哉曩朱文公承絕學之傳其書敘疑非西京於孝經則刊誤焉詩去其敘易異程氏中庸疑於龜山楊氏程楊朱子本以傳授者也審爲門弟子世固未以病文公也陸文安公生同時仕同朝其辨爭者朋友麗澤之益朱陸書牘具在不百餘年異黨之說興深文巧闢而爲陸學者不勝其謗屹然墨守是猶以丸泥而障流杯水以止燎何益也淳祐中番陽湯中氏合朱陸之說至其猶子端明文清公漢益闡同之足以補兩家之未備抑又聞之當寶慶紹定間黃公榦在朱子門人不敢以先人所傳爲別錄黃既死夸多務廣有語錄焉有語類焉望塵承風相與刻梓而二家矛盾大行於

南北矣廣信龔君寔松始發憤爲朱陸會同舉要於四書集陸子及其學者所講授俾來者有攷刪繁薈精余於龔君復有望焉夫事定於千百年則罔有異論故歷舉興廢之說若是噫龔君之書有俟夫後若余言亦殆將得以同傳也至治二年八月辛未袁楠序

五經約說序

古之學者三十而五經立方其時以力田致養爲先本春出于野冬始入邑其勤懇懇然日不能給暇日入學歲率不滿十旬焉噫何其敏且成如是之易也蓋先王盛時鄉遂溝洫之制明冠昏賓蜡之禮具絃歌俎豆鐘鼓弓矢之事周旋品節皆身親而日化則所謂通其義者道德性命之理也簡牘日繁專門經師夸宏務奇漢世儒者白首莫一微言旣絕掇拾枝蔓而媮意惰業率自涯而返良有以也夫子之翼易二戴之傳古禮解經之準的也訓詁別立爲小學析文以言字因字以生義究其大較邈不相入然則士何自知經旨哉唐孔賈氏尊漢儒宗知其迂陋猶旁諱曲覆如臨師保不敢有犯獨啖趙出口指摘無所

避至劉原父氏歐陽氏始慷慨直論未幾言經者銖分毫別疆畫同異亦駸駸乎漢儒矣夫一道德而同風俗作者之事也復古而不至焉者儒者之責也六藝之道莫急於禮樂樂書廢已久而儀禮迄不得立學官遺音舊器莫可尋辨登降進退揖讓之損益臨事取具跂就企及卒泥夫近古吾獨謂學古之士猶足以語夫此也廬陵宋元翁爲童子時能明經明經舉廢已久獨元翁興起其事弱冠復約爲大義先王墜典炳然其專美矣夫天人之奧昔人之所罕言而昔之耳聞目見接熟素履今皆棄置不講元翁氣清德茂養泉糞木必以源本約而同之與道俱會後之學者將由是則焉敢誦所聞而美之

鄧淳翁春秋集傳序

因褒貶而傳春秋焉聖人之餘意也悉貶而遺其褒焉非聖人之本旨也粵自周室既遷史列於諸侯典策之藏世莫得見而其記載之法號稱近古故凡是非善惡之實天災時變之著直書而不隱逮于戰國執簡侍史者猶守而未墜然而攻劫凌據之侈相尋而莫之顧實由夫外史之職不行于邦國其史之存

於國者又將日幸淪棄而無所傳證故益得以逞其驕而恣其所行若是者二百餘年矣聖人始出然後因其史之本文而修明之別爲之書以信于後善乎孟子之言曰孔子成春秋而亂臣賊子懼若是則春秋其果爲褒貶哉三家之傳事與義例膠鞮殺素刻者若法吏博者若辯士上下二千餘載各執所嗜介不相並而玩獵蒐擇髣其音聲益遺其形傳愈疏而經益湮矣夫因義例以明聖人之意懼義與例不得而盡廣其記聞不燭於理則事益無以自附春秋之道幽而明無傳而著論至於是良有以也自唐以來合三傳者始各以其長自見然而求於外者必謹於內純明粹精非自外至焉者耳先王之典禮舊章具於傳記悉心以推之閤而日彰墜而復完則禮者又春秋之標準也邵武鄧淳翁慨不行於今特立己任纂而爲編復因胡氏七家而增廣之余嘗謂審乎人情酌乎事變非春秋其誰準感而通天下之故則易之用其與是相並始於春秋而終於易者邵子之學也淳翁學首於是必有其本敢因以訂諸

王先生困學紀聞序

世之爲學非止於辭章而已也不明乎理曷能以窮夫道德性命之蘊理至而辭不達茲其爲害也大矣是故先儒有憂之且夫子之言有曰興於詩立於禮成於樂其品節備具見於禮之經解夫事不燭不足以盡天下之智物不窮不足以推天下之用考於史冊求其精麤得失之要非卓然有識者不能也若是其殆得之矣在易之居業則曰脩辭立誠而畜德懿德必在夫聞見之廣旁曲通譬是則經史之外立凡舉例屈指不能以遽盡也揚雄氏作法言其意亦有取夫是後千餘年禮部尙書王先生出知濂洛之學淑于吾徒之功至溥然簡便日趨偷薄固陋瞪目拱手面牆背芒滔滔相承恬不以爲恥於是爲困學紀聞二十卷具訓以警原其旨要揚雄氏之志也先生年未五十諸經皆有說晚歲悉焚棄而獨成是書其語淵奧精實非紬繹玩味不能解下世三十年肅政司副使馬速忽公僉事孫公楫濟川分治慶元振起儒學始命入梓橈游公門最久官翰苑時欲悉以其所著書進于朝廷因循不果今也二公謂橈知先生事爲詳俾首爲序庸書作書之本旨亦以厲夫後之學者先生諱應麟字伯厚

自號深寧居士泰定二年冬十月門人具官袁桷序

大易通義序

郡侯郭文卿示易通義一帙曰此真定侯先生所述也先生幼喪明聆羣兒誦書不終日能悉記其所授稍長習詞章自謂不學可造詣既而悔曰吾明於心刊華食實莫首於理理以載道原易以求則爲得之於是精意讀易旁通曲會參以己說而名之曰通義讀其書浩乎其詳也簡乎其著也因理以測象若遺焉而不敢廢也桷學易蓋亦有年矣原夫八卦既列象斯立焉故卦有理者焉有象者焉理有以言爲象象有以理爲用理與象不得而偏也聖人懼其言之雜也諸卦之彖專言夫理而取身取物悉見於爻辭矣又懼夫設卦之理象不足以盡也復繫之以上下傳而其象位之明著悉見於說卦至矣盡矣後之儒先言理者過於浮略象廣喻而泥象者微言隻字咸取以爲象角立交病三聖之旨泯然莫知所歸自朱文公發變象之說學者始知所宗君思深而識幽據會提要蓋將爲程子之忠臣倣文公以入夫邵子之室非潛心尊聞者不能也

今年逾九十康色未艾先生名克中字正卿郭侯俾敘其書將入于梓不讓而爲之序焉

老子講義序

昔之善言老子者謂其同者合於易其不同於孔子者皆矯世之弊此論千萬年不能以易也新安程泰之作易老通言余意深得其旨讀之茫然不能以脗合語簡則理得大羹玄酒夫豈旨於味乎老子之五千言不得已而爲言也道爲乾坤之體德爲咸恆之用繹其辭旨觀妙觀微見天下之蹟而擬諸形容者也衆妙之門易之門也功成弗居治蠱之道也使民無知無欲百姓日用而不知也挫銳解紛洗心藏密之旨也多言數窮吉人之辭寡也谷神不死生生之謂易也後其身外其身以前民用之道也水善利萬物坎之行有尙也持盈揣銳君子有終也生而不有爲而不恃無思無爲也埏埴爲器戶牖爲室十三卦制器之義也有之以爲利無之以爲用民咸用之謂之神也爲腹不爲目觀我朵頤之凶也寄於天下託於天下知進退存亡而不失其正者也迎之不見其

首隨之不見其後神無方而易無體也善爲士之章出入以度無有師保如臨
父母之謂也觀復復其見天地之心也皆謂我自然不事王侯高尙其事也若
夫十八十九二十章矯世之言也其中有物其中有精坎離之體未濟旣濟之
用也不自伐故有功謙之義也有不信焉亦矯言也跛者不立鼎折足不勝其
任也有物混成易有太極也輕則失臣躁則失君君不密則失臣臣不密則失
身之義也善人者不善人之師益道也知白守黑窮神知化之義也去甚去奢
去泰致恭以存其位也將軍居左帥左次无咎也道之在天下變動不居周
流六虛之義也自知者明顏子之不遠復也自勝者強君子之自強不息也終
不爲大虛以受人也視之不見聽之不聞極深而研幾也不疾而速不行而至
也柔弱勝剛強坤至柔而動剛也利器不可以示人君子藏器於身也守萬物
將自化神而化之使民宜之也上德不德章矯言也謂得一者貞夫一者也萬
物生於有有生於無蔡氏曰兩儀之先其易無體兩儀之後其易有體有無之
義於斯見之明道進道探蹟索隱鈎深致遠之謂也道生一一生二二生三三

生萬物石林葉氏曰易之數見於大傳者乾坤之策也物亦非萬之所能盡該
微見其緒曰引而伸之觸類而長之天下之能事畢矣老氏言數曰道生一一
生二二生三三生萬物莊周言數曰一與一爲二二與一爲三自此以往巧曆
不能算老氏所謂三生萬物者猶易之言當萬物之數而不盡其說也莊周所
謂巧曆所不能算者猶易之言引而伸之觸類而長之而不窮其變也至漢言
律曆者於是始於易數之外起黃鍾之一而三積之至於十七萬七千一百四
十有以爲五行之數備已而又爲三統之說以五行相錯由三微三著積之始
於太樂而終於二千三百六十三萬九千四十而復於太極上元以爲天下之
能事畢無爲老子之旨義與生而不有同旨既同則無思無爲之義同矣知足
不辱知止不殆諸卦之上九類之清靜爲天下正憧憧往來之反說也知足常
足繫于苞桑也其出彌遠其知彌少稱名也小取類也大之義也爲學日益爲
道日損兼損益而言也懲忿窒慾損也見善則遷有過則改益也聖人皆孩之
退藏於密吉凶與民同患也善攝生老子之本旨致一之義近之矣道生德畜

乾坤之用也生而不有變化云爲也塞其兌言行君子之樞機也慎言語塞兌之本也閉其門行其庭不見其人之謂也介然有知知微知彰知柔知剛介于石之義也善建者不拔確乎其不可拔也脩身至天下中庸之論也精之至和之至男女構精化生之道也玄同不見是而無悶也以奇用兵以此毒天下而民從也禍兮福之所倚福兮禍之所伏繫帶之三褫也治人事天莫若嗇卑而不可踰貳筮可用享也有國之母可以長久安土敦乎仁愛之道也非其鬼不神睽之羣疑亡也大國取小國小國取大國湯文王是也謙之上六得之矣道者萬物之奧廣大悉備也何棄之有容民畜衆也坐進此道藉用白茅无咎也圖難於其易爲大於其細易簡而天下之理得矣爲之於未有治之於未亂履霜堅冰也合抱之木生於毫末喻積小以高大也下二章亦同也民之難治以其智多禁民爲非曰義則智去矣江海爲百谷王天水違行而由一以生也下者水之道需而蹇蹇則通矣下濟而光明之義得矣曰慈天地之大德曰生也曰儉損之道也曰不敢爲天下先巽以行權也善爲士夫子於益

或擊之立心勿恆凶之爻詳言之矣用兵有言仁者無敵也吾言甚易知易知則有親也知不知滕口說也民不畏威不威不懲滅趾滅耳之爻得之矣勇於敢則殺天道虧盈而益謙也民之饑節以制度則不傷財不害民矣人之生章原始反終故知死生之說也天之道其猶張弓日往月來之義也天下柔弱莫過於水坎之內爻堅強者也故險之時用大矣哉受國之垢國君含垢也明夷之義於斯見之常與善人積善之家有餘慶也小國寡民章通其變使民不倦也利而不害乾不言所利保合大和乃利于貞矣爲而不爭爭地爭城老子之親見也王侯設險以守其國夫豈有爭哉予固嘗以易釋其旨而未有成也同里呂君與之故儒家閱世益深游於方外以其著老子一編見示甚似夫子之所見其文詳順而實援據以精築室於海島孤絕之地黜聰窒明以養其泰和且又將窮極山川之幽勝以求正於有道誠可謂老而能學者也故輯舊說列于前凡我同志知予之不妄許可者有在也泰定二年七月清容居士袁桷序

班固氏輯劉氏七略爲藝文志其序醫經方藥終以神仙十家殿之尋宗探本厥旨深祕近世習老氏者則以爲薄清淨務名實若班氏去取未足爲吾學輕重其不習老氏者因其先後遂以爲尊吾聖人莫若班氏緣聲附響深切明著之道二者皆所未喻也醫經方藥具訓于先古其不得已而爲之意世莫之曉惟空林隱竇刻意繕性之士必極其本致而後能知之故其察五行乘剋之理七情摩盪之原兢兢惴惴使夫身不至於已病而餘功後效積精以適神者斯近夫神仙之說矣班氏深存其義而隱其說故世之方士皆荒忽詭幻復別爲一家以自侈靡而所謂非聖不言者則有戾五福之彝訓仁者靜壽之義於道何取焉予嘗謂有經天下之志必有經天下之事胼胝之勞在陳之厄其飢寒困苦雖九死不得以自悔視夫彈冠結綬爭奪得喪談性命之空而忘事理之實者則有間矣故每信而不敢自異居里時獨高君彰一清慕方外學嘗以爲醫經爲性命之本若冶金鍊石諸祕詭事皆不取殫極年歲悉取上古漢晉諸經方以及唐宋所續出經分緯別定其精良刪其繁雜別爲十事謂必由此足

以通夫仙道而其意與班氏適相脗合高氏衣冠爲四明望自獻簡公闕掌成均定學制當秦氏廢錮正士卽致事以春秋禮學教授鄉里內翰公文虎禮部公似孫父子皆以文學致清顯至大宗伯衡孫爲端平正士脩儀偉貌年八十餘手抄見聞及方技諸書疊疊道舊不輟一清爲諸孫得於宗伯爲多淵懿之深簡聞小誦非所可擬疑駸駸乎與學仙之道通故今自號爲通仙子云然予幼聞諸老言葛天民曾景建以神仙說游公卿清言玉雪苦意冰蘖見者憐而欲成之後卒不就最後里人王丹池復以是說游亦不就十事之成於吾徒誠有賴未知通仙之本旨其果能有成也朱文公於老氏嘗曰恐逆天理信而不泥然未始與浮屠者同其議悼日月之如流知玄髮之易化高君其奚以辭因敘而致意焉

四明志序

成周疆理之制審於王畿首合同姓以夾輔至於四履則必假異姓焉以控遏之先後疏附曲盡其制何周且詳也四方之志猶懼其不能以悉知也則必以

外史掌之社亡入秦而書具在區區刀筆吏獨能收其書據要漢中夫豈偶然也哉世祖皇帝聖德神武混平寰宇首命祕書監儒臣輯大一統志沈幾遠略與昔聖人意旨昭合然而郡志缺落其遺軼未備焉者不復以徹于上馬侯澤潤之固嘗爲中祕官知之矣暨守四明乃曰明舊有志今爲帥大府浙東七州推明爲首阨塞戶版物產地利是宜究察以待問清風舊德與昔之高閎巨闕屬於宅里者猶可考也謂楠久爲史官宜有述楠嘗聞之洙泗遺俗稽之以久遠者道德之澤也詫鎔銖之利以害于吾民昔人之所不道空虛說增農日益困甚者紀其山林屋室之盛奉書詣庭若執符契爭莫能已是殆昔之無知者根其禍也管夷吾作書訓子弟良厚而內政以漁鹽爲急儒者諾之維明負山橫江歲厄於水旱河渠是先牧民之本推其沿革覽其山川知昔時得人之盛宮室戶口之無恆釋道遺文之盛衰是皆足以增其永歎焉者矣乃爲十二考以志其事遂不敢以荒落而有辭也馬侯爲政愷悌惻隱以宜于民民以不病郡博士吳君某勤恪承令詢索州縣之所宜聞者良備因是得以成書焉

李景山鳩巢編後序

梅過永嘉張宗魯書塾度河間李景山氏手校朱子詩傳謹視之旁行側注朱墨定竄精善心慕焉雖未熟詳知其名能詩吾意非近世詩士也近世言詩家頗輩出凌厲極致止於清臚視建安黃初諸子作已憤憤不復省鈎英掇妍刻畫眉目而形幹離脫不可支輔其凡偶拙近者率悻悻直致棄萬物之比興謂道由是顯六義之旨闕如也是歲冬見于京師始讀其詩於雍虞德生質而不倨綺而不踰襲衆芳之英融寄于窮厓絕域之地而審其昔日之心滿意肆蓋將沖寂寥廓脫然以逃焉者也夫子之言曰詩可以怨然不怨可也怨己則責難於天誠不怨邪幽蘭之辭湘纍之賦得而廢之矣若公之詩非悲其不遇也凜焉以持者正也反而言之斯怨矣又何病焉予嘗從問雲南土風歲弄兵不止計安出公曰理則人擾則獸豈獨雲南哉退已書諸牘復識于序後若德生所論次者不復著

至元二十四年間南康劉公爲內相宋社未亡桷髻年侍先處州府君子錢塘
獲識之議論雄偉誠奇士也後有客自京師來者必詢其詞命制作多慊愜不
能道踰十餘年穆入禁林得玉堂制草而讀之編次荒略詞臣之名十不存四
五是則劉公之文無因而推考焉者矣至治元年冬十月其嗣判官君某彙其
遺文相過焉俾有敘桷讀之手不以釋夫集腋於裘擣珍於鼎非精別者不能
也尊其所聞足以信後諛言美說非後進之所宜爲也東平李公謙評公之文
曰學問該洽性理精詣承旨王公構則曰深妥雄健博碩光明廣平宋公渤亦
曰氣感辭卓溫縟宏雅嘉禾張公伯淳則又曰浩蕩橫逸是數公者司衡挈繩
將俾夫後之學者翕焉以從其傳信何疑矣夫以理爲主文常患於不工雕鏤
委心茫然而無以畔岸是則爲是者良難矣命焉而得所遭事久則論益定觀
其詩文於當世羣賢之言有考焉斯得矣

樂侍郎詩集序

故吏部侍郎河南尹樂公詩一編其季子克誠以家集散軼守其記憶者得若

千篇將刻于梓俾有敘揄讀而作曰嗚呼旨哉方南北分裂兩帝所尙唯眉山蘇氏學至理學興而詩始廢大率皆以模寫宛曲爲非道夫明於理者猶足以發先王之底蘊其不明理則錯冗猥俚散焉不能以成章而諉曰吾唯理是言詩實病焉今夫途歌巷語風見之矣至於二雅公卿大夫之言縝而有度曲而不倨將盡夫萬物之藻麗以極其形容贊美之盛若是者非夸且誣也五經言理莫詳於易其辭深且密闡幽顯微不敢以直易言之考於經皆然也宋之亡也詩不勝其弊金之亡一時儒先猶秉舊聞於感慨窮困之際不改其度出語若一故中統至元間皆昔時之緒餘一一能有以自見若吏部公則親受承安貞祐之傳故其詩清切俊邁足以振數百年之遠響俾置諸中州之所編次其何能以辨公諱舉字用之號藏齋與父運副皆金進士家世源委所從來有據傳以永久孰曰不宜

曹邦衡教授詩文序

大江以南地爲荆揚郡不過百十其言語風俗起居飲食之異邈不相近世方

理文治而士大夫言詞章高下復人人殊數十年來文益媮體益弊乘高駕浮滑稽恣睢恍乎其不可詰絜而至於道者不懼則僨邈源而論之蓋方承平時師表日增士以其類至尊其所傳過於自守而樂凡近者尤矜矜然祕重不妄與一道德而同風俗先王之教誠不若是也余嘗會文於同志反復力議而卒以自病廬山曹邦衡客京師三年矣閉門弦歌絕造請之跡顧屢察之而卒未之與議將行始示其詩文一編蒐奇稗精炳然而橫陳列懸于簾擣珍于鼎聲味相屬而凌厲感悱蓋將合律呂之變適酸鹹之宜者也夫不自是其是必有則於古守其私說不能以自廣將固且隘博以求之精以思之日遷而歲異當於是乎益今四海一國士之不可強爲者猶跂而及文教之洽由是而一曹君勉乎哉往慎乃塗正轅而行其寧有不至者耶

清容居士集卷第二十一

續書卷二十一

歐陽文忠公集卷二十一

清容居士集卷第二十二

元 袁 桷 撰

序

韓泗州老人詩序

往八十年金蹙于汴盡汴民咸勝兵抗鬪不得息聞其父老泣撫黃稚謂不幸生亂離使言承平時疑卒未見果承平耶余弗得見得見焉必若等也不十年而金亡又四十年世祖一轍迹郡縣轉輸屯戍徭徼江以北悉撤省而汴爲樂土今三十年矣私怪當時父老言合龜卜特不知得年者幾何人又不知得年而果佚樂者爲何如人夫壽與富天不能並昇鎔銖之較願與計莫以勝也大德丙午韓泗州君美書來京師曰余家嚴君偕老于汴俱八十矣桷與泗州交最深官於吾鄉最久與之言文詞道政事切直近實今守於泗泗與汴水陸相望甘旨致問不絕汴總河南十數州得領公府事上汴奉觴跪行盡其私歡二老人方彊明艾和游戲閭里登坡陁極榛翳臨車飛礮動在耳眼嘗指而慨已

而以喜而泗州又能清謹愷悌祝其神明以養其志慮休休焉不知其將耄古之所謂陶唐氏之民者於韓氏見之矣中都之士咸美而賦四明袁桷爲之序

張氏宗譜序

宗以族言斯古也別以爲宗記始也大宗非諸侯之制也居小宗而遺大宗自鄭氏大記之釋失之缺其大宗小宗乎何取然則曷爲大宗也大宗之法不施於庶昆弟謂之別者大夫學士悉有宗也天子以國諸侯以封世守其祀莫敢爲宗下于庶人而言宗焉遺其大宗不可也大夫士有常宗由大宗而爲小宗小宗不可以承祖故分而言之小宗之嫡斯大宗矣此繼別之義也張氏之各得爲宗也奈何張譜始於東平東平其大父善也東平之長子禮爲豐縣丞豐縣東平之大宗也其季義居於東昌死復葬焉有子五人長曰叔溫爲高沙屯官東昌之大宗也古者適於他國皆別爲宗國一而地異別之義斯近矣張譜軼於兵迎而數之首豐縣之禰悉張氏子孫更數十百年宗不能易也高沙之禰居東昌合豐縣爲小宗始高沙爲大宗宗各有別尊祖之道斯備矣張姓出

于姬至周而氏著祖于韓其得望者十二曰襄陽洛陽河東始興馮翊吳郡平原清河河間中山曰魏曰蜀東平譜祖以上名不得而次合賢與貴後而書之失近據遠譜其疑矣惟貴與賢不偕同也誠貴矣非賢不能傳使果賢邪雖弗貴焉可也張氏之先墓隕於河族厄于逃今其孫若曾咸曰別爲始者猶邈也至東昌而復別何敢忘之太和之季叔恭敬父則曰爲譜辨宗百世猶今也且昔之不幸吾猶慊慊焉噫敬父之心思而深肅肅然念其先敏儒以自持其與也於是乎在敬父今爲宗正府左右司都事大德丁未作亭于東昌之墓旁表曰宗會翰林學士廣平程公爲之記太子文學魏郡元君復初系之以詩而俾余爲譜史官袁桷述

廬陵羅氏世譜序

黃帝二十五宗距唐堯猶未遠世系昭穆混錯若不可考置而不論者謂其詳不可聞也禮莫詳於周展親別宗強本弱枝之慮品式備具不數百年難生於所親兵車日尋卒之顛覆僨絕何也其所以繼之者非其道也禮生於人情貴

貴親親禮之大經繇貴而失親聖如周公猶不能以制宗法之不講所由來舊矣後漢鄭康成謂諸侯之別子爲大宗自大夫士而下皆不當有由是常宗之法廢貴爲王公其所以承攝者止於五世鄭氏之說誤也譜牒學廢姓氏殺雜獨孔氏子孫更數千百年歷歷可紀而姬氏享國八百餘祀秦漢之際已散軼僅存後王盛衰抑無以議爲矣或者謂孔子垂世立訓貴不以位故其所傳久遠然考諸傳記蠻夷小邦率一姓數十世噫立禮以辨位位尊而益爭昔之聖人夫豈不知其有是哉消長之理相尋於無窮其不可詰者數存焉耳矣廬陵羅氏譜繇唐至今爲世凡十有五爲派凡十有八旁行邪上如指諸掌合職方氏小史之記貴戚累葉者亦莫能並統宗合源一其所尙必有其道參差不齊物之理也先之以孝謹終之以卑讓黜爵貴德雖百世可推也桷也公侯之子孫因羅氏之譜牒將有感夫昔時之興廢企焉若不及而終之以自勉者亦羅氏譜之微旨也延祐丙辰八月史官袁桷序

姓氏之學魏晉以下無稽焉歐陽子作宰相世系切切然將私其親然卒數世
亡軼是則凡言譜牒者缺之焉得矣氏族混於周之東遷祖以爲氏猶之可也
別族改氏因其官簿以相沿襲益繁多矣繇是爲賜姓爲缺文一氏而兩望同
源而別派至於推律觀物慕風嚮化雜然而前陳其避禍者託焉以自逃承宗
繼絕漫不可考竄易傳會紛然莫能辯者數千百年皆是也宗法之不講所從
來久謂百世不遷者德如后稷焉斯可矣后稷而不能則凡爲吾徒者得無懼
乎孟子有言曰君子之澤五世而斬均小人而言之何邪昔之親盡蓋見于孟
子然而私淑之道充孟子而能爲之者吾於危氏之譜其殆庶幾矣夫遠而不
可明者理之常也究其初以合乎貴賤貧富其心博其旨微將使夫困者通盈
者持危氏之盛循環無窮於是乎有考焉是矣維漳州大夫於楠曾大父樞密
越公同淳熙進士同乙科同著作同爲番陽文敏公之門人其弟南昌君族祖
正肅公實銘其墓槨來京師族孫有成嘗曰兩家疇昔若是譜非子敘不可不
幸有成卒其弟歸其骨于臨川遂不負其言而序之

熊西玉文集序

粵昔以經賦科進天下士有司崇尚日異辟雍居俊游尤爲準繩音節程度更
擗迭變雲翕影附各以其伎進拘者輒困躓不得上方是時蜚英溢行爲時所
推重連百州之地不能以什一數觀音聲之近絕師弟子之敬和筆繕札傳誦
不止其好慕實使之然也當咸淳初江以東言熊公焉余師剡源戴公言爲同
舍郎時學官始授題熊公據案瞪目鉤深摘微落筆澄澈理融意新蠶則績而
珠纒屬也未幾失仕東歸沈冥編空林窮厓之怨橫溢間發而安之有命不
憤不悻猶昔日年壯意盛之所作擬諸於德殆其微與噫陶唐氏之亡歷年滋
多精深憂思愈遠愈在極周陵遲諸子相繼有作是則先王之澤不可以一日
泯自漢而下殆無以議何則理不勝弊焉故爾夫弊不極不足以自振此強仁
者之所宜知嘗聞公閉門盡心索六藝之蘊以極遠紹後之學者是宜有考故
不知其不能而申其說命序之者實壻張拱辰氏也

近世儒先以韻書首於江左其理未竟論者疑焉夫聲與韻文字之自然童歌巷語肇於唐虞旁叶偶傳與君臣賡歌相表裏非若今世拘拘然以清濁爲高下論也小學廢已久言六書皆本於許慎或者謂揚雄太玄奇字與許氏不合皆其私臆殊不知屈氏而下若司馬諸賦其不易解辨豈亦其所自製故昌黎韓子謂凡爲文宜略識字則世所爲許學者苟趨省易實秦相斯之學也按魏李登始爲聲韻增益衍廣實原七均七均之說成於江左江左之文綺而萎其於韻若法律爲師條分目析鎔銖之不可混也降於隋唐守其說而莫之變能變者宋惟吳棫氏今世所行唐韻博極羣籍之要見於其序而近世附益終莫能已噫學其果有止也邪眉山陳君元吉少以春秋試有司第一南極交廣以游夫幽冀之平衍搜奇尊聞包絡攬拾因韻以廣卒爲是書名曰韻海班然而居編懸在庭各得其職雖第而輕重之同律呂也屬辭比事春秋之教殆猶其微與昔顏魯公爲韻海鏡源集古今韻字凡三百餘卷識者謂其摭華撮要該於理著四庫散落不具而今也卒俟君以成合流納污愈遠愈清至於海者百

川之功聚也敢誦所聞而因以序之

鄆城馬節婦詩序

詩始婦人先王盛時天地萬物之理推變審情者若是矣不幸而大故守中秉德合於自然憂辱恐懼蓋不能以相動也二南之化行於天下未及數百年陵夷變遷首於國君夫人聖人憂之錄於風雅書於春秋後有述作尤惓惓焉以致其意嗟夫乾坤之道相濟以成者也皇元一海宇累下詔郡縣孝子節婦按實旌植是謹鄆城王母其狀曰馬氏年少喪夫養姑鞠子織粟盡恩禮閭戶循飭四十年終始不易由是鄉老言于州州上其事禮部繇是得加桓表焉桷待罪太史歲終常會以奏書然陳詩以觀史官之職也凡我同志什爲詠歌先之以憂勤終之以燕樂足以見夫國家德化之廣非止爲王氏榮也豈不美歟長子質山東宣慰府掾季獻今爲翰林院都事云

蕭克有字序

在昔先民理得於簡易其言動視聽之方不求合於禮而所謂禮者何其日用

而不知也唐虞之際黎民時雍至於湯武出而禮益立於是升降揖讓以成其容爲之珩璜以節其步武爲之弁冕以嚴其首服黼黻有度尊彝有數溫柔剛毅寬嚴張弛之教復品節而備具之噫可謂至矣世益衰而法益繁悉刑以防其情民之日不幸者非天之所與殊也俗煇而說厖教不足以勝靡然從上以自治其亦未知其本始焉者也周之衰諸子馳騁激於世者黜仁絕禮以自高急於近功則皆苛迫峭刻益莫知其所措聖人政刑德禮之論幾乎其息書曰臣人克有常憲解之者曰憲猶法也奉有其常者也民之初生淵乎其仁詩書禮樂造士之具也不由是而推奉法以爲固有夏后氏之世吾誠知其不若是也廬陵蕭御史之子憲其師黃君字曰克有請其說於余詩曰天生烝民有物有則克有之義備矣假於外以爲常將失其所謂由己之道修其由己之道莫若乎禮故余先言其得於天者如是而復以學禮之說告

袁氏舊書目序

袁氏舊書目者目袁氏舊書之存于今者也始曾大父越公舉進士時貧不能

知誤如

得書書多手抄強記至用高祖妣齊國夫人魚魴冠學書後官中都凡二十有五年乃務置書以償宿昔所志其世所未有則從中祕書及故家傳錄以歸於是書始備矣于時國家承平四方無兵革之虞多用文儒爲牧守公私閒暇擊鮮享醴會寮屬以校讐刻書爲美績至於細民亦皆轉相模倣以取衣食而閩之建蜀之益其最著者也紹定辛卯公自宥府歸里遂累土爲堂貯所得書於東西榮公日處其中客至不復道世事顧嗜陳黃詩擇其適意者手書爲編寫物詠歌與道游遨休休焉如其年之將耄如是者七年而薨舊書之傳距于今四世矣桷幼聞公從學正獻公時有手校九經旁說疑義皆附書左右最爲精善欲從諸父一觀而未得又欲合諸父之藏分第爲目錄亦不果竊嘗謂天下之物聚多者終必散或者早計於未散則庶幾幸有一存之理遂悉藏於山中己丑之災偕家人渡江以逃袁氏之書一夕而盡昔之預計者乃幸而獲全嗚呼此公之靈有以啓其衷也惟公以勤勞起家其書之傳不幸而不存固當歸之於數其幸而獲存者敢不襲藏心思而躬踐之以求無忘前人之意謹次

其本始書以爲舊書目序

袁氏新書目序

余少讀書有五失焉雅觀而無擇濫閱而少思其失也博而寡要攷古人之言
行意常退縮不敢望其失也懦而無立纂錄史籍之故實一未終而屢更端其
失也勞而無成聞人之長唯恐不及將疾趨從之而輒出其後其失也欲速而
過高好學爲文未能蓄其本經術隱奧茫乎其無所適從泛然而無所關決是
又失之甚者也夫爲學之道用志不能不一用力不能不專農夫莽而廣種不
如狹墾之爲實也工人泛而雜學不如一藝之爲精也往者書未模印時爭傳
寫授讀較余所藏之書不能十一而士以三年通一經其自得之實皆足以傳
世垂後其視余之書多無成者豈古人所謂沃土無善民之說與往年春書燬
于火偃仰草萊所失物不復追憶而於書獨不能忘懷已乃思前之五失一旦
而悟將從事於內以求自得之實其年夏大人過故都復購遺闕篋載以歸意
者斯文之富將過乎昔而余又思旁搜遠錄俾夫昔日之藏矣噫年未至於壯

其五失可以亟改也而古人之志余亦竊有慕焉用識吾過以爲袁氏新書目
序首

文子方安南行記序

始余讀戴記帝王疆理不盡於衡山而虞書致日迺南極交州是則要荒不責
其貢賦使者雖歲往返亡害也馬伏波議兵法與建武帝合勞民入於潦霧蚩
蛇之地其得意自敘反不若賈君房建罷擊議時俗升降略地定功後王所尙
者然與唐置安南都護府獻令鮮薄同羈縻州開元詔太史測天下晷交州爲
南履準事與唐帝類不聞其有僭拒事也萌芽侈心承詔旨以肆誅索一不得
意而曰損國體者是誠盜臣也已世祖文武皇帝神幾洞察不加以兵而安南
畏威不敢朝終五世削王爵以奉貢今天子卽位頒正朔議遣使於是文君子
方拜禮部郎中爲使副以行辭命專達儀注品節唯子方是毗入其境不旬日
卒致命以還稽諸往使五十年所未有也還都示予行記一編夫誦詩專對夫
子之訓也予於書獨有取焉宣上意儆有衆誓命焉有考山川導別表土俗以

宜于民莫詳於貢書至若贊帝德以傳示永久是非史官不能子方以論譏奉使事三者將兼而取之誠於詩書殆相表裏矣蠻荒會長俾知夫中國有人焉者其自子方始窮極珍麗媚上以營夫己者子方不知其說也是宜廣梓以告于後之使者云年月日袁桷序

白季清母夫人受新封詩序

春秋經錫命之制後王以品秩益展其追榮倣古則今至于是大備今皇帝嗣大曆服桷時在翰林得與議典章儀注僉曰勳爵古制以人子所居官褒崇之罔俾專美于前代定其格入奏皇帝曰可輕外重內非廣孝道視所居官咸大賚之詔下皆叩首望闕謝浙東元帥府都事白君湛卽以其所宜封者爲母盧夫人請于朝得封太原郡太君盧白皆中原望族盧以文詞鳴翰林白氏再世持雄辨清言冰雪纒藉聞者莫不興起若是者尤足以振耀也噫世之崛然因其夫與子蒙爵命者多矣未有若盧白之清望足以厭服于當代恃其世家白君之所不敢朝夕溫清陳白其所行事秉心以公張弛與革孰不曰是真世家

後夸詡者誠不足爲兩家重也郡之儒士相率爲歌詩以贊俾桷首爲序泰定元年冬十有一月前史官袁桷書

甬山集序

文章與時爲高下誠哉是言也宋祚將亡國學考文其悲哀促急不能一朝居四方翕然取則凌躐上第至今殘編斷牘讀之令人歎恨不已蓋士生斯時能自拔以表見者不一二數有一人焉則又韜匿沖晦與世若不相接始予少時見三江李君在明于史塾其貌癯然其語泊然僅知其爲長者也下世十餘年子汲以所爲詩文十卷號甬山集相示貫穿籠絡悉本于五經之微旨而優柔反覆羈而不怨曲而不倨藹然六義之懿宮商相宣各叶其體情至理盡守之以嚴無直致之失世之號能爲詩文者率不過是較一時之輩流實居其最惜乎昔時之承接不足以知其萬一也維昔秉義公以威德肅裕世科聯踵今五傳矣論其詞章則擬於先世爲有光汲能廣而傳之惠於吾鄉俾其子孫得以遵守豈不韙哉泰定二年冬十月袁桷序

蓬萊閣詩序

會稽爲禹會諸侯之所自嬴政一登而其山水之勝迄兩漢孫吳莫有表章或者謂當是時征伐蠻粵爲用武地而士大夫在朝廷簪筆執牘以奉天子之游宴顧安得從事於荆榛險絕以暢其耳目哉惟太史遷出於沈落不偶以至而見於賦詠實自東晉始方王謝諸賢南徙渡江北望丘壘其悲離感愴不在於仕進故其意念殊絕搜奇抉幽樂天以俟命而會稽號爲南鎮將騁懷以摠其所尚故今之言游山水實自會稽始繇是而降游者益廣而專牧守之任者得兼有而畢具矣元微之以觀察使鎮會稽所辟幕客皆知名士號爲絕倡後人作爲蓬萊閣蓋取微之詩語唐宋鉅作悉刻于其上雲內王侯叔能父洩是邦政簡訟平百廢俱飭復閣之舊迺曰昔之諸賢意必有在登斯閣也將見夫同寅之肅和寮案之堵共飛觥擊壺以彷彿微之昔時之盛巖壑交暎神閒意消不苛刻以暇豫彼俗吏瑣瑣夫豈知是也哉同郡儒士合賦詩若干首楠與叔能同官于朝審平昔清靜簡易之論於是乎見雖老尙能爲侯賦之泰定三年

正月甲子清容君士四明袁桷序

馬氏族譜序

譜以遠言懼其非吾祖也以近言有悲吾之不得已也金徙于南衣冠故族扶挈僵仆十失其九者有焉百不得其一者有焉難甫定遺童孤兒想像先人之容儀音聲僅得於髣髴推名諱至於祖則有能言者矣上而高曾不復有能言矣余嘗攷夫譜牒之書秦漢以後牽強附會世表姓纂僅取其近似作史者不得不爾凡爲子孫者罔敢以是爲傳信河陽馬氏蓋皆昔時之望族今元帥公知夫高曾以上之不可以譜遂斷自其可知者爲之旁行側注官位名諱以明其始卒葬年月以慎其終用意弘遠將以期其子孫之日盛嗚呼百年之計莫先於德德愈種則見於後人者不俟而自至晉丞相王文獻公導渡江始立家譜不及三世而蕃衍盛大史不絕書馬公之意蓋若是願相與勉乎哉則得之矣泰定二年七月乙卯前史官袁桷書

鄭原善思親詩編序

廣信鄭君復初舉進士之歲時維三月值其嚴君始生之朝作爲歌詩而終之曰移忠云自茲其立志誠遠且大矣夫仕莫不欲榮其親仕貴矣所尚貴乎自立不爾則其於貴也乎何有故昔之學仕者必求夫大賢者之格言以佩服之若鄭君者策名未離乎都門超識遠抱先之以不苟若是余嘗於殿廬識之冲然其容介然其操審必能有異乎衆也暨余還里咸言其在官也奇表不入於市貴俠不登于庭盡職而無所顧避是其所蓄足以行所願矣泰定三年秋八月同校文江浙始見其屬和者凡一編嗟夫古之果於正誼必寧夫親而爲親者計其詘辱將與之同患難而不之避故載於史傳者不一鄭君之志見初筮馭歷既遠聲譽益振始信夫家庭之教在乎夙昔誠不在夫今日也因申其旨而爲之辭丙寅歲八月壬辰袁楠序

周彥祥存樂堂詩序

往者淮甸爲南北要衝耕耨不足以盡其地力彌望數十里皆草屋星散高下每歲春秋避兵輒土窖稻麥老稚潛匿叢薄中丁男健婦守舍相偵伺黃塵駭

天猶能在旁近結集保護卒然有相接持挺箠盡力以抗其甚不幸者則皆係累長驅銜車逐馬故凡淮民之家子不識其父弟不知其兄因循苟活慈孝恭敬施於家庭之懿者未能也吁誠可悲也夫世祖皇帝一海宇淮始爲樂土今四十餘年昔之父老言昔時之事未嘗不先之以教獻繼之以幸喜野無閒民而詩書庠序之教駸駸乎雍熙之感廬江周君彥祥於是作堂以奉其二親而名曰存樂予嘗以爲生乎今之世有幸不幸存於其間故其愈後者則愈樂而生乎其前者若彥祥之二親是也彥祥之奉親當補其昔時之不可致推彥祥之年亂離崎嶇猶耳接而身受至其諸孫則蔑有知之者噫豈非愈後者則愈樂然則彥祥之心所以樂其父母昆弟者可勝道哉太學博士姚君爲之記善爲歌詩者將別爲一編乃首爲之序彥祥今爲某官

白鶴詩序

泰定元年春二月有旨醮於崇真萬壽宮特進宗師吳公主祠事越四日有白鶴三集雲中指殿前五日復至旭日晏溫執事有恪皆承睫仰視一口贊慶士

大夫各爲歌詩以侈其異嘗聞禮儀神明之事莫嚴於精意而諸物之畢至夏
係乎聖德之通感惟今天子踐祚之初詢賢考能斂福以錫庶民籲天請命實
不私於己祠祭之事遵敘以行罔有偏好昔漢宣帝勵精圖治嚴蒞祠事時則
有白鶴集于廟庭異代同符稽諸行事實過於彼而祝釐奉祀以承上命者罔
敢暇逸吳公蓋有之焉絕地天通昔之聖人將以止夫襍祥之說天人之際合
於自然蓋有不期然而然者不然詩書所稱其得而廢之與詩若干首遂爲之
序補鳳山公集卷之五

春臺詩序

老氏之學以澹然無欲爲至道故凡人之所同然者必激言以相反至於榮觀
燕處其走日廣其說則曰吾教必若是侈靡盛大浸淫於天下其言曰如登春
臺彼嘗非而鄙之今考其所爲若不相似視其言者吾猶以爲近古也延平余
君惟熙於是取以爲齋名焉昔之感時淳厚給足充然樂其身非直爲耳目之
美觀日作夕息相安於閭里康衢之謠擊壤之歌其教易行也今海宇一轍戶

口田野休養蕃廡涵濟聖澤庶幾時雍之治惟熙慕古於是乎得之矣理適乎
中人情之同隨物而遷者過也極枯槁禁制以爲至樂矯然者也惟熙嘗爲威
茂安撫司僉事今屬國史府通敏守禮推命名之雅其將樂夫天年同衆以求
用於世者與集賢大學士郭公大書其戶冊朝之卿士咸爲歌詩

曹伯明文集序

江西之文曰歐陽王曾自慶曆以來爲正宗舉天下師之無異辭宋金分裂羣
然師眉山公氣盛意新於科舉爲尤宜至乾道淳熙江西諸賢別爲宗派竊取
國策莊周之詞雜進語未畢而更事遽起而輟斷續鉤棘小者一二言長者數
十言迎之莫能以窺其涯而荒唐變幻虎豹竦而魚龍雜也嗚呼三公之文其
思厚以深其理精以正凌厲乎諸子貞元而下曾勃然不肯自讓後之人懼蹈
襲之譏卒至於濫觴淪胥而莫能以救可勝恨哉大德中桷與端明曹公之子
伯明甫爲翰林屬其爲詩文如桑麻穀粟切於日用不求酸鹹苦澁以傷乎味
之正篤實渾厚與其履踐見於事物者實相表裏夫行以爲先言實次之言不

勝不足以害道翕翕夸詡含譏以射人者猶懼其不解方手指其說曰吾意蓋有在若是而罹于人禍者多矣伯明以親老再爲編修官補外以去幾二十年來京師爲文若干卷得而讀之其哀窮舉躓略枝葉之學春容雅馴以循夫規矩它不能以詬病也夫慕其輕浮而欲求似於瑣瑣者伯明之所不忍抑有聞焉老而能學吾二人之所宜繼炳燭之勤願相與切磋焉

清容居士集卷第二十二

以道野休養無所不周
中人情之同應物而異
聖文之士以爲歌詩



天下歸之無異辭宋金分勢
江蘇江西補資刊爲宗版
官長者一二官長者
三公之才其
三公之才其
三公之才其
三公之才其
三公之才其

清容居士集卷第二十三

元 袁 桷 撰

序

送鄧善之應聘序

近世先達之士類言求進于京師者多羈困不偶煦煦道途間麻衣弊冠柔聲媚色無以動上意其言若諄切懇款後進之士懷疑而不進百以十數然遇不遇命也而言若是則抱道自足者益無忌於世而或者亦得以窺其介且固焉夫道成於同而弊於孤雲龍之相從風水之相應其理然也往歲余與巴西鄧君道所以嘗以爲今世無是決矣吾徒當力學爲己閉門息心耕六籍之圃漑根以茂實若古逸民高士退靜自樂其於道也無害方是時君家錢塘鷺塵五達之衝意寂而體舒無造門囁嚅之勞下帷授書衿佩森立公卿貴人皆傾下愛慕獨君無少矜喜而去來朋徒各盡恩意以相周奉其有不可強猶謙拒慰藉人咸以爲其未遇也已異夫褊心者之論則其遇當不止若是今年春承徵

將如京師告余以行余固喜夫人之所期者有驗而其行也復將有說焉君子之出也大言以行道者夸誣之流也相時而行守身於不辱謹得避難貞白而無愧斯近之矣方今食太官衣御府亡慮數百擬之漢世爲盛吾意吾丘周仁之徒道不相類若貢禹之經明行絜區區車馬之對亦若無可取者苟不以是進則其氣昌而愈完行周而無躓於得喪益無病矣夫處順者逆言莫能入嗜味者腊毒無終悔予與君疇昔相好無所隱思處贈之誼而密以告焉

送曹伯明序

議者謂故家世官陽明精絜之氣極于簡冊溢于圭組威衰消長始相尋爲無端焉嗟夫豈誠有是理哉百尋之木上干雲霄盤礴慘舒履之而後至其風雨雪霜之變適其事會理之不可詰者誰得而辨而苟一時之得失以自詭吾未之信也士患不自知而卒病夫知者迄莫可究至於凌高躡深愴疾進幸其安肆顛越而莫救則豈其父兄之過至不幸糜爛墜覆與世爲始終者要未得

以成敗論也廬山曹伯明官翰林十有二年始爲編修官議當敘遷曰愚名居

先願以讓秩再滿則又曰太夫人春秋高願補邑以行吾知其感衰消長之理炳于胸中確乎不能以易者也維昔從祖文簡公既老來朝翩然東歸位不充其德未幾先正端明公敦知止之誼慷慨力去邈乎高風趾燮不墜謙以居之仁以成之振世德之緒使議者之言不出乎口其自伯明始因其行序以識之

送范德機序

四方士游京師則必囊筆楮飾賦詠以偵候于王公之門當不當良不論也審焉以求售若乘必駿食必稻足趼而腹果介然莫有所遭夫爭藝以自進宜有不擇焉者心誠知之孰慚其非故幸得之則歸于能其不得之則歸于人惕然而自治吾未之見也臨江范德機游于茲三年矣語焉簡然行焉恂然嗇其菁華韜焉以深視世之言文辭位貴重者靳靳不自表夫子曰道不同不相爲謀范君誠審焉抑不可知使不可知則凡辱與游者責莫能以辭也君所爲詩文幽絮而靜深怨與不怨皆存乎天慨然南歸善治其學彌謹所徇使果擇士耶無以易矣譬之璞焉蓄極而光遇寧有不遂者乎惜其行解以俟之

送周子敬序

溫與閩地犬牙相入俗秀而矜絜子弟勝衣能文詞父兄相與言命束裝負書以行四方劇切感動約不有所就不復見故凡困于有司則適從諸公貴人職牋記劇談論翹游以自逞其橫厲捷發者讀太公孫吳書彙鞅轅門建功業萬里樂生重遷卒無所思其故土然視閩俗爲最少噫弊成于過高安其所常義不能以自勝恬不知改積數十年來蔑有以議亦固矣當咸淳間周子敬以治經游錢塘聲至士避未幾而科舉絕來四明授業于嘗所知己南望數十驛每悒悒不自置罄囊橐以歸拜其家君焉得奉終于其家夫情合於中情至而不從者非罪也縱情而不返極其所從於理乎何有始於榮其親終於私其身漠然而不接茲惑滋甚視子敬之道得以愧矣子敬將終老于吾鄉棄其田廬畀于季弟以奉先人之祀今年夏季弟疾亟貧不能以行天台趙叔度官于溫載與俱歸審其心於季弟友且怡也楠與之交最深慕其靜安絕毫髮僞妄蒼然長身風雨一室無子弟欣助而清韻雅語舉觴晏如與之違寧無介然者乎今

歸于家其耄者必曰當終樂於我此土也幼者則曰先生老于行悉于事某聞某戒願執簡以受去魯之意吾未知所決也化民成俗之道必自上始因俗以徵其謬子敬其何遜敢俟而質諸

送劉習卿序

今之爲守令者據文法以具事事弊而法具雖更百吏焉無易也事當而文不具一撓詰之辭舌無所對歲部使者入境吏曹取舊牘相考訂附益完善至各押題署恣所補不復問使者坐所治決事搜擿十不得一二然皆毫末靡細於政體不相涉故稱能吏者或以苛察議噫徒法不足以致理任情而失實故先王爲法以禁其過久而繁滋則審於治者簡而易之使不病焉斯可矣大德丁未浙東西以饑告殍移日屬于道官會其數于鄉將賑活之其不實者究焉鄉登名于縣縣審而始聞于郡郡以事至重闔郡寮以議其一以故不預則旬月以俟乃得達部使者部發使於鄉復詢察而周詳始定其議如令夫幸民之饑乘而弊焉者羣下之過也因其弊而持久之則民之死者日益甚法顧安得以

救有司者之意夫豈不知是拘於文狃於故相安而不改其勢然也今年夏中書掾汴劉習卿御史府舉爲浙右肅政從事習卿精敏簡廉與余議古今事嘗欲以無法爲法其施張而品節之者必中理道至於條據辨析灼與繩墨脗合向宦江南灑然無俗吏意據鞍賦詩危坐終日一語不及律令今從事職掌號總所部爲至重故余舉今之所急者以告俾毋汨於常而變通焉彼瑣瑣守文者又烏足與語是

送祝道士南歸序

世祖皇帝取江南首詔召龍虎山嗣漢天師掌其教或曰其父觀妙公嘗推天人之要教由是尊元貞制書嘗言之今上卽位歲以天壽節命使者祝香于茲山延祐四年天冠山道士祝君爲祠官將行求予言以餞噫盛衰消長相尋爲無窮禎祥之說儒者之所不道守經執中則必一其說以立教然而窮居巖穴之士精思據會其爲書也幽明簡深由變察來使之默焉以知畏將以定夫天下之象夫豈荒忽以眩於衆理有所不能逃焉者若是矣老子之學法於簡易

陰陽闔闢必本於其身因身以及物故凡水旱疾癘必責其徒其徒則曰吾無爲也何取是若是則其教之廢也久矣昔先正肅公守饒觀妙公始十四五以禁祭上章入靜室正肅公嘗與之論天運環合之道觀妙公愀然有言曰公老不復見當在四十年以後于時族祖永州親聆其說亟言之龍虎由觀妙以興祝君多藝能沈靜篤志其歸山中正辭永命予不能以告敢誦所聞願有以推究則世人之所深望將不憚煩豈若彼大言者飽食自嬉以無聞於後姑勉乎哉

贈宣城汪澤民登第歸里序

今世論道理詞章爲二塗師道德之說者毫分縷析派其近似而刪黜之其言博以約據會統宗謂一足以總萬也然懼其辭工而勝理則必直致近譬山林類放諺俗之語皆於是乎取甚者金石著述勦其說而師倣之莫得有議焉者矣昔者夫子言行見記於門弟子簡絜精粹嘗並於五經初非有意於辭也謂不若是不足以有傳也性與天道不可得聞私獨怪近世學者參錯輩出過子

貢十百倍將惟其所尙而然邪抑羣聖之道存於書涵泳濡膺不期然而能者
歟科舉廢已久今天子崇闡文治損益條制以興其賢能入表之士連軫結袂
于然以來然而沿襲之弊相尋於無窮愛憎之說若不相似宣城汪君叔志首
上于春官報罷以歸則曰吾學未至焉耳探幽闡微遂益治其業戊午歲復來
京師擢乙科授同知平江州以歸則又曰仕優而益學斯可矣將行求余贈言
以歸余固感夫二者之不相同也綴言以續文將以明理也理不自得剽襲以
求之文益弊而理日益遠將焉以爲準與之以化成天下實自有司始操繩墨
審程度有司盡之矣合八音以成律呂師曠猶難之噫有司之任其果能有同
乎維昔端明公誥命擅天下制作具備集衆美之效也慶流雲仍叔志之踵儒
科于今十世矣志專而氣昌異於凡近其異也必能以復古家世趾燉莫叔志
若也故余以昔之有疑者告之而因以勉焉夏四月越袁桷序

送吳成季歸省序

噫吾徒來京師視成季有三愧焉居京師者不宜以塊處蓬蓬然結鞍整袂借

日以進其不能是者目以爲固野成季則不然閉門展書視日蚤莫冰渚而川止也達公貴人語未脫口納柔奉佞千巧百詭成季獨正色指畫朗言某事未當至論天下休養大計龜灼繩直聽者喑舌方疾趨以行不勝其愧成季幼爲方外士常所置論必曰吾父母皆耆年矣惕焉不得以朝夕養而吾徒將捐棄尊愛荒塵敗屋啜蔬飯糲業官以爲生如無所容歸若是者愧之大者也今年春承詔如南得省其親樂不能以已而懷愧者亦爭道而交贊夫人之情於道不遠極其所驚而卒莫之救化之者不足以導歟將人事之未思不復以致此歟唐之陽城語若鄙近薰然而歸養者凡數十人何則機使之然也儒於道最高力不勝其弊則成季之出處吾當疾馳焉從而慕之整轅於四達之衢斯得矣又何愧焉因其行序以侈之

送達兼善祠祭山川序

古之爲使者亦難矣哉存撫省聘諭言語協辭令必盡其誼嫚有致辱之道焉情則媿簡則侮約而有常敬以成禮斯其爲使者之事矣然此特平世而言之

也飛矢旁午國懸於三寸之舌探機以析明輕重揣情僞定議於瞬息使不亦重乎哉奉天子命持節萬里外憚之而莫屈而因事專輒宣威布德函首入覲非夫勇智超絕不足至此歷千百年數人而已矣吾嘗觀夫列國諸臣禮以定儀言以敘志結繪執玉若合符節而其諷諭陳白足以截其驕泰蔑有敗事非強辭以言是其夙昔之所素備夫子之言曰專對不能其警夫四方之使與皇元一海宇偏陬遠島蹙縮候賓館無事於使者而歲以祠祭使望於山川分道四出其爲使也若甚易至治三年集賢修撰達君兼善以使由恆山濟源東南上于會稽吾於兼善有言焉恆山古真定地也二河交流濁漳貫其旁郡縣築防歲不得息或言有運河在焉民居墊蕩宜詢其俗而條紀之濟源在懷州懷河南地相接昔之括地輿賦民不勝其害河流靡常空灘遺磧墾殖以自肥者其誰與會稽杭相襟帶粟帛絲布丹漆綺繡之作倍於他郡奇袤夸誕故都之習不能以革獨會稽山水秀朗民朴安業往承大饑荒壘彌望猶不能盡耕昔有逸民戴安道賀知章其故家曰王謝能有若斯人者宜表而出之悉疏歸以

俟明天子之清問則得之矣因其行故序以告之

送曾巽堂南歸序

景定中樞密東陽馬公帥臨安先子職酒正入幕府于時廬陵御史曾公相後先佩鳴纓影剖吏牘若破竹俱欲以功業自致運數合一兩家子弟東西數千里過庭入塾志同業同而僕適先爲史院屬會御史仲子于京師年富志銳屢策焉以儆不能止也皇慶承徵入翰林復會季子焉氣清貌謙不爲汲汲計嘗曰仕以傳世豈然以取諂誠不敢平進以求而猶曰未宜吾有不甘焉今爲應奉文字論者始斂口蓋其爲文敏而新其待人周以和夫孰曰不宜春三月謁告盡室以歸求言以處桷曰今居顯榮清密者凜凜不自置名至矣文不能以稱文不能以稱造物之所不畀於是乎有覆絕之憂焉煜然以興萎然隨之是則得者失之兆君何憾焉桷官翰林踰二十年老不戒止念之至者滋以懼將歸故山究五經之蘊爲書以蘄遠文詞之任老不能以進炳燭之勤願相與勉焉泰定元年三月四明袁桷序

贈崔兵部序

高句麗崔君耐卿往督征稅於京城不私其餘以進于官既又懼爲後來者之莫繼也則慊然曰吾豈爲奉上之罪人哉復疏以告于上曰事適然願勿以爲程數噫崔君仁矣哉今世善言利者督括虛籍峻鞭朴以求媚嘗認認以告吾所居官能贏餘以自效當升夫資秩相率以效朘削日廣而其徒爭不肯自置其猥闢者則攘臂以取不顧利害其弊有不可勝言者今崔君兩得之不希于公不病于民絜矩之道至而做夫在位者皆得以同是道也崔君往爲內史府官見天子于王邸大器異之今卽位首拜兵部員外郎兵曹之事多於昔飛符調發水陸之需頃刻在立辦寬則事不能以濟稍苛急民之病有甚於專征之弊崔君推昔日之心明以核之仁以恕之政績之著有踰於昔將步武日躋廣經濟之志不愆於素守楠也願拭目以觀因志其美以俟焉泰定元年三月癸卯四明袁楠序

送王叔能守會稽序

桷與北京王叔能交幾二十年其贊行省於浙江也盡心而不苛合上下之情
婉而加且詳焉弗亟以邀美弗固以逞志執政宜之寮案服之至治元年丞相
慎選左司之熟於政體者叔能在選爲都事英宗皇帝更庶政除前相所行不
便事下詔天下命御史臺樞密翰林集賢集議桷時得預末席叔能首言江南
兩稅已定復增買區銀賦買無常居賦重卽逋逃今徵額籍具使無能輸將併
於主戶主戶旣主徭役是徭役之外別有銀賦將不勝其害羣公以爲然新詔
旣下取首建議爲多古之善言利者莫先於劉晏晏所行不至急刻而晏迄不
善後是興利爲害身本也躁於求進卒之自唐以來如晏者皆無以自保吁可
不懼哉叔能世居燕北而樂於江南於江南厭其囂煩而樂於山水屢丐補於
外宰輔察其志奏守會稽會稽王謝之所居泉石清美有不可勝道逸少安石
經世素蘊託丘壑以自負蓋深取而有擬也昔之陳迹按行而搜撫之舉觴以
酌其訪於民俗也不察其毛疵事至而應無欲以自化將見獄空訟息少者避
於道老者游於衢擊壤以歌沐太平之治郡守之賢必以王公爲第一矣因其

行序以祝之

贈孟久夫南臺掾序

世嘗病夫儒與吏其道不同卒莫有一其說者爲吏者曰法定於後王微忽不可以相混也徵調出入官簿淺深不可以踰越也童而師之猶不能以盡今儒者之說急於所緩高而迂滯而疎卒一遇焉吾深知其莫能成事矣儒者則曰法有不忍人之意焉審官別人制用有常沾沾然迎好以刻意非爲治之本也然而爲儒者莫有以見於用聞嘗用之其肯繁節脈融貫昭哲之理疑有所滯而益得以藉口吁是誠難矣今天子崇尚儒術立進士科昔之舉茂才者咸試吏以盡其材智憲府舉按守令閭閻纖粟令式高下日接于耳目果勤而敏修若視鑑焉瞭其妍醜無有逃遁於是儒吏之一倣自今始吏部從事孟君久夫以茂才舉者也兩屬于司憲復辟御史府矜抑自將盡其廉隅入吏部朝夕謹曹事人莫有識其面遇事守令甲不踰越旁暢曲就藹然由守儒素吾知足以有用於世矣未幾江南御史臺復辟爲掾將行袁桷告之曰御史臺職諸道黜

陟歲終會事以廉直舉者不能得一二人黜者何多陟者恆寡激獎之道豈上有所未備邪守法而不變視其成牘惻然以求仁善人之用心非墮法以爲直也州縣賢否孟君嘗知之矣執中以權使無偏焉亦儒者之說也故重之以言

崔君都事餞行詩序

今之言贊畫者以撫拾爲能羣吏抱成牘入幕府一不可意輒曠日相持不決由是揣摩迎合弊有不勝言者矣昔人之善吏治事決於頃刻理定於造次安于其自然人莫能有以爲非者心出乎公也海右帥府事號最簡其治於民者七郡之守令係焉寓於軍旅總戎夫長之職任焉今而曰某事所行吾將論之以從我又曰吾不能坐視其利病更謁迭請由是有撓政侵官之譏雖不面議退而悉數其長短者皆是也夫其職在於奉行先之以更張上所增疑而下益得以議是殆昧於守官之道矣大名崔君義甫之爲都事也未明攬衣坐署執筆無滯礙其不便者白於長官從大府以行一介之卒不入於所隸敦厚侃侃守正以自律其給之者謝不與較養恬藏智閭巷之人不知崔君之贊帥府三

歲解去而其不知者始曰詎不知崔君無囑託於州縣吾是以不知今而曰知
始惜其去而願後來者之與崔君同也噫功利增羨人所願學每率得奇禍而
猶接踵不悟視崔君所爲其果有悔乎郡之文士相率爲歌詩以餞桷遂爲之
序

贈陳太初序

戰國之士以雄辨長說游諸侯立致卿相故其高自譽道無所顧藉雖困躓有
不肯悔揣摩相師遺言成編今七十二子之書皆足以爲游之具也漢世尊尙
黃老游士屏息武帝開絕域於萬里外游者復至盡其足之所歷圖寫險阨立
功效能以其荒怪異物輸于地圖而口舌之學悉廢與戰國之游有異矣南北
分裂游不越其國游之效不能以著唐立科舉各挾策自奮窮山水之勝履危
陟幽則皆其羈窮不遇之所爲見於詠歌蓋不以爲利達富貴也若是則游之
道幾廢矣宋承唐舊巖居逸士見於聘徵游者益恥至於季年下第不偶者輒
爲篇章以謁藩府京淮閩廣旁午道路數十年不歸子弟不識其面目囊金輦

粟求筦庫之職以自活視前之游戛戛然難相並矣世祖皇帝大一海宇招徠
四方俾盡計畫以自效雖誕謬無所罪游復廣於昔敵裘破履袖其囊封卒空
言無當以其無所罪也合類以進省署禁鬪駢肩攀緣卒無所成就余嘗入禮
部預考其長短十不得一將遏其游以喻之游者訖不悟朝廷固未嘗拔一人
以勸使果拔一人將傾南北之士老於游而不止也今游之最夥者莫如江西
其拙游者惟浙東浙之東天台以能游稱四明之士不著於游錄餘五郡間一
見之括蒼陳太初壯歲能詞章得濟勝之理西適錢塘復來四明以其藝游公
卿多深獎之業儒以爲本復挾能以自張其寧有不遇者故余歷言游者之幸
不幸太初之游夫豈若是然哉生之高祖容州府君與先樞密越公同爲淳熙
進士於其行得盡其言且命二子爲歌詩以餞

送俞教授回里序

吾郡教官由至元丙子以來見於題名者亡慮數十人皆得而接識之其通於
綜核者善移易故籍結熟郡守鉗士口不得發歲時表章經說疑義卒假耆舊

以陰助誦聲寥寥講授不立不復以師道自任由是諸生之亡賴者挾短長以剽竊廩稍而貴駸之子弟恃其可侮益得以恣睢有終歲不入于學宮極於弊壞而勸學之詔屢下爲虛文矣始余以爲吾郡惟然後官京師見教官選于吏部凡數百人罷老不勝任十居其六若吾郡之弊十有三其俊秀博習則皆爲館閣掄選各得以自見而所謂若人者十僅居其一焉噫考昔時得人必在教官今不如昔或者謂入仕之門必慎其始故今之爲教官不三考已致其事尙何能冀其惠淑之益哉合吾郡之教官得一人焉曰天台吳君宗彥吳以牋記游公卿其文辭亦關絡合時用去三十餘年復得一人焉曰永嘉俞君希魯用中父其屬筆纒麗若錦機然五采彰而文密也其行溫然其容粹然聽其言若飲醇酎而愈恭也論理而不泛取友而不雜余交於俞君不一年而知其所爲若是惜吾郡之後進習於故常不能以請業於其行序以餞之爲歌詩凡若干併見于後

送陳山長序

郡博士而下其尊且專者莫若書院數十年來朱文公之說行祠宇徧東南各以四書爲標準毫杪摘抉於其所不必疑者而疑之口誦心臆孩提之童皆大言以欺世故其用功少而取效近禮樂刑政之本興衰治亂之迹茫不能以知纍纍冠綬礙於銓部老死下僚卒莫能以自見良有以也蘭亭有書院自東平王侯始右軍之學非止於一藝也經綸憂世寧不仕焉以見其志審勢陳害瞭然指掌非善於謀國者不能也語必堯舜高自譽道卒至變易紛擾而莫可救視右軍之行事誠何如哉參政清敏陳公之曾孫鑑翁爲長于蘭亭求余以言家世之正學不能以告憫夫世之通弊知長于彼者考右軍之傳做其所言陳白于太守太守王侯通達國體求儒以自近君有言其寧有不遭乎

送蔡府尹歸里序

郡守之任亦重矣視其精神爲之折衝鉤抉一不加意吏挾以侮民逞以姦故其食息嘗內省外顧非智與力兩全者不能也朝廷察爲仕者之有病於吾民也於是著致事令而其罷軟昏眊不待年而具者朝廷亦不能以限之也余官

京師見有請于廟堂自陳其剛強矍鑠雖不之許察其意猶有缺望噫羞惡是非人皆有之若是果何如哉濟寧蔡侯茂先之守於四明也屢引年以請于上考其年猶未至也既而曰吾宜休而不得謝可若何遂移疾家居踰三月始告于其同官及嘗所往來曰吾具舟江潯將行矣於是咸驚且誦曰蔡侯之來民實不知戢其奇表返于雍熙不苛不黷歲則大熟侯復于所再命作牧自余歸里中數聆其議論明而通相時以行無矯激之過焉保其身若是人孰得以議審侯之進退將以爲不知止之勸聞于天朝其寧使夫終老於里閭則其去也蓋抑將以有進也文學之士是宜爲歌詩以餞遂首爲辭泰定二年九月丙寅郡人前史官袁楠序

送閔思齊調閩府序

閩郡縣蕃產饒給仕於彼者咸曰可善更蓋其疆理與京師相遠浙爲要衝貢賦考工之役使者督責亡虛月而閩獨以絺繡爲勞視若重任較二浙爲十一耳閩浙二帥府府史更迭受任然終以閩地煙瘴蒙犯少優其歲月隴西閔君

思齊由浙東更於閩則曰不然九州分設唐虞之制也今皇元以仁武函諸夏
卉裳重譯罔不臣服幅員倍古限南北取士非上意也立賢無方是則世祖之
明訓而凡吾徒之居於南者稍得致通顯輒言財用掇奇禍或言刑法致深文
根株排連牢不可破守正脩己悉不復自達矣楠曰珠玉蘊于山淵採擇者必
之夫絕域是寧有遠邇耶世祖皇帝遣使徵聘必先夫江南歲月既遠聞者益
荒見者益狹彼區區售技自獻者實不與昔時並思齊敏不自夸百受而不撓
精於琴知急焉不足以知操縵將緩以求深懼其爲屢緩也考其中聲按抑止
泊澹兮若無營激兮若有感是則於政事文學法理於此盡矣蔑有加矣楠老
矣遲君之還猶能鼓南風之弦歌明月之篇其果有合乎泰定三年秋七月清
容居士袁楠序

送薛景詢教授常熟序

泰定元年吾里進士上南宮曰薛君景詢程君時叔史君車父三人者皆故宦
家所居皆在城東志同道同聲聞同意其歷階以陞比肩而袂接也未幾獨景

1013110
詢下第于時余編試殿廬景詢不以咎而余獨恨景詢之不果遭也天子新卽位推龍飛恩授常熟教授以歸將之官求言以導其行抑嘗考隋唐選舉之法不久卽弊今夫所謂經疑者以知行禮用而鈐約之不中不遠經說萃于一家按其形模而脫鑿焉不敢以自異也有司守固陋而程式之千士一律欲求其總核同異會衆美以合乎至論不可得矣賦貴於鋪揚因雕蟲之譏而以理致爲長屈宋兩漢之作誠不若是之易也至於考晁董之對則方諸近作有不待辨而明者自設科取士桷未嘗不預議焉嚴以取之則近於隘俛以售之則鄰於率心惡焉以不釋薛君較藝於京師誠知其有幸不幸操車於四達之衢險阻曲直惟御是審則淑於是州者必有其道吾將見褒然秀出者推是州爲首是則薛君之教也

國家圖書館



002452135

